

宋學士全集

七





宋學士全集

(七)

宋濂撰

宋學士全集卷之十一

傳

余左丞傳

余闕字廷心一字天心唐兀氏世居武威父沙刺藏卜官合肥遂爲合肥人母尹氏夢異人生闕闕生而髮盡白家貧年十三始能就學嗜欲甚淺不知有肉味惟甘六藝學若飴嗜之不厭與河南張恆遊恆臨川吳澄弟子善談名理闕之學因絕出四方擢元統癸酉進士第授同知泗州事泗瀕淮民豪弗馴令蝕人土田官籍之多以誣去闕繩尤暴者數十不敢譁廖甲與舒乙競田廖焚舒廬舍舒婦偶母子同死遂寘灰燼中誣之闕爲白其事泗無麥民以乏故事弗聞闕上之中書定爲令凡無麥者減賦代還長老爭進金爲壽闕謝去後闕往桐城道逢故民皆羅拜馬首相隨信宿而別俄召入應奉翰林文字轉中書刑部主事三月之間疏滌冤滯獄五百上官忌其才議寢不合闕上宰相書言狀又不報投袂而歸居亡何復召修遼宋金三史拜監察御史上疏言守令最近民欲萬國治責守令反是政龐宜用殿最法力行之便上從之藩王府諸校白晝放金道上勢如狼闕鞭遣六十人上思治切議遣奉使巡察郡國闕言奉使恆無狀所至處食飲供張如事至尊曾不能宣上憂恤元元之意宜亟罷之闕後補外會奉使者亦至執闕臂曰誠如君言知闕忠亮不怨闕在位知無不言言隋直無忌人勸闕少辟阨闕曰吾縱慳豈不知批逆鱗爲危委身事君身雖殺弗悔也改中書禮部員外郎闕議復古禮樂其言精鑿有徵聞者斥爲迂闊

弗用。安西郭氏女受聘未行。會夫卒。郭自縊死。有司請旌其門。闕以過於中庸。不可以訓。格不下。出爲湖廣行省左右司郎中。廣西多峻山。負粟輸官者。厄於道險。費常倍。闕命以爲帛代輸。右丞沙班怙權自用。多錄其私人。闕每抗辭沮之。會莫徭蠻反。當帥師。又止不行。無敢讓之者。闕揚言於庭曰。右丞當往。受天子命。爲方嶽重臣。不思執弓劔討亂。乃欲自逸耶。右丞當往。沙班曰。郎中語固是。如芻餉不足。何。闕曰。右丞第往。此不難致也。闕下令趣之。三日皆集。右丞行。章宣慰伯顏以婆律香贊闕。闕覺重辟之。香中果胎黃金。章歎曰。余贊達官多矣。潔如冰壺。唯余公一人。復以集賢經歷召入。預修本朝后妃功臣傳。遷翰林待制。出僉浙東道廉訪司事。發姦擿伏。聰察若神。州縣聞闕至。貪墨吏多解印綬去。釐定賦無藝。役小大各遠度。闕避官履畝實之。徭賦平。衛士無養。以沒入田分隸學官。郡長燕只吉台肆毒殘衢民。民重足立。闕鞠治之。獄上行。御史臺臺臣與其有連。反以事劾闕。闕歸青陽山。已而丁尹氏憂。闕日夜悲號。有甘露降於墓。君子以爲孝感。至正壬辰。天下兵動。平章政事晃忽兒不花方統戎淮南。承制起闕。權淮西宣慰副使。分治安慶。安慶距城皆盜柵。人爭謂不可往。闕毅然請行。從間道入。推赤心待人。罷其苛賦。轉粟以哺餓夫。八社民翕然歸。闕知民可用。乃帥之破雙港砦。砦甚固。小路若髮。闕被甲荷戟直前。賊空砦出。闕殺傷相當。至日昃。賊殊死戰。闕不勝。退復收散卒。誓曰。死則死此爾。何生爲。一鼓而進。大破之。諸砦畏威。次第降。闕益繕城浚濠。礪矛戈。分屯耕郊外。田民懼不能者。遣軍士護之耕。賊來輒與戰。一日賊四合。旌旗蔽野。鼓譟之聲震天地。闕縱騎數十大喊而出。賊勢披靡。遣兵擊之。斬首數千級。當是時。淮東西皆

陷。獨安慶歸。然存。賊來戰。又數敗。賊銜之。僞作尺牘。通城中諸大姓。約期日反。冀闕捕戮之。闕曰。我民安有是命。悉焚去。賊計窮。復令闕故人衛鼎。許大明。以甘言說降。闕命牽出。以鐵椎擊碎齒頰。懸其皮東門。潛山有虎傷人。闕造文檄山神。使驅虎。虎出境。功上中書。朝廷俾爲眞陞同知。淮西宣慰副都元帥。賜以上等及黃金束帶。江西諸官軍。動號數萬。掠玉帛。殺嬰兒。寘戟上以戲。沿江州郡。患苦之。獨不敢近城下。卽近出師。搗退之。或服其義。至有來歸。充將校者。溪河兵屯潯陽。命使者帥壯士百輩。腰刀直入。脅主供億。闕叱左右收縛付獄。且上疏言。苗獠素不被王化。其人與魍魅等。不宜使入腹裏。他日爲禍將不細。後竟如闕言。轉淮南行省參知政事。尋改右丞。賜二品服。闕益自奮。誓以死報國。立旌忠祠。以厲將佐。時集祠下。大聲謂曰。男兒生則爲章孝寬。死則爲張巡。許遠。不可爲不義屈。意氣慷慨甚。丁酉冬。賊大集諸部圍城。戰艦蔽江而下。樵餉路絕。兵出數失利。戊戌正月七日。城陷。闕猶帥衆血戰。身中三矢。賊呼曰。余將軍何在。吾將官之。有生致者。予百金。闕戟手罵曰。余恨不得嚼碎汝肉。吐餒烏鳶。寧復受汝官邪。賊怒。舉長鎗欲刺闕。闕遂自剄。沈水死。年五十六。其妻耶卜氏聞之。亦率其子得臣。女福章。赴水死。諸將卒慟曰。余將軍不負國。我等可負余將軍邪。從而死者千餘人。朝廷知其忠。贈闕榮祿大夫。江浙行省平章政事。諡曰愍忠。追封夏國公。闕爲人剛簡有智。無職不宜爲。爲卽有赫赫名。所至薦賢旌孝義。如恐後。每解政。開門授徒。蕭然如寒士。五經悉爲之傳註。多新意。詩文篆隸皆精緻。可傳。贊曰。

於戲闕眞人豪也哉。獨守孤城逾六年。小大二百餘戰。戰必勝。其所用者。不過民間兵數千。初非有熊虎

十萬之師。直激之以忠義。故甘心効死而不可奪也。雖不幸繼絕城陷以死。而其精忠之氣。爛爛上貫霄漢。必燦爲列星。流爲風霆。散爲卿雲。凝爲瑞露。闕雖死。而其不死者。固自若也。然而闕死於君。而能使妻死於夫。子死於父。忠孝貞節。萃於一門。較之晉卞壺家。又似過之矣。於戲。闕果人豪也哉。余來江左。見其門生故吏言闕事。多至泣下。因想見戰守處。江流有聲。而斷雲落日。淒迷於莽蒼間。猶足以動人悲思。因掇其行事成傳。以示爲人臣者。

濂旣作余廷心傳。又見其門人汪河言。當廷心死時。其妾滿堂。生一子甫晬。棄水濱。有僞萬戶杜某呼曰。此必余參政子。是種也良。不可殺。竟捐所鈔諸物。懷子以去。今三歲矣。人或戲子曰。汝父何在。子橫指拂喉曰。如此矣。此一事也。池州判官李宗可。斬人也。李嘗文身。又號爲花李。善槊。視賊欲吞。廷心兄闕嘗以女歸之。及來舒。命權義兵萬戶。統新軍守水砦。前後多戰功。賊來破城。李橫槊入賊中。殺死甚衆。聞廷心死。馳馬還家。聚妻孥謂曰。余相公死國。吾亦義不屈。汝等倘不死。爲人所魚肉。拔劍無大小。盡殺之。出解甲。據胡床中坐。取酒飲至醉。復衣甲自刎死。此一事也。嗚呼。仁者宜有後。而義烈之士。聲光可流於無窮。濂雖不文。唯恐其失墜也。故復附著於篇。

白牛生傳

白牛生者。金華潛溪人。宋姓。濂名。嘗騎白牛。往來溪上。故人以白牛生目之。生軀幹短小。細目而疏髯。性多勤。他無所嗜。惟攻學不怠。存諸心。著諸書六經。與人言亦六經。或厭其繁。生曰。吾舍此不學也。六經其

曜靈乎。一日無之。則冥冥夜行矣。生學在治心。道在五倫。自以爲至易至簡。或笑其迂。生曰。我其迂哉。我若迂。孟子則迂之首矣。生好著文。或以文人稱之。則又輒然怒曰。吾文人乎哉。天地之理。欲窮之而未盡也。聖賢之道。欲疑之而未成也。吾文人乎哉。或求學文。生曰。其孝弟乎。文則吾不知也。生不肯干祿。或欲挽之使出。生曰。祿可干邪。仕當爲道謀。干之私也。生安於義命。未嘗妄有所爲。或疑其拙。生曰。我契以天。不合以人。是乃巧之大者。拙乎哉。生慕孔顏之樂。如聆鈞天之樂。如獲襄曠之金。言及之。手足舞蹈不已。或以爲狂。生曰。吾能知之。恨未能允蹈之。奚其狂。生幼多疾。常行服氣法。或謂其欲久生。生曰。盜跖甚夭。顏子甚壽。子知之乎。或人不答。生曰。竊陰陽之和。以私一己。服氣矣。運量元化。節宣四時。服氣乎。生雖貧。喜色常溢眉宇間。或詰之。生曰。吾內足樂也。內既足樂。無人非。無鬼責。得亦樂。失亦樂。我何憂哉。生御惡衣。悞饑安之。或慮其詐。生曰。錦衣與卉服雖異。暖則一。糟覈與滄熬固殊。飽則均。何詐爲。生不貴貴人。不貧貧人。或尤其無別。生曰。貴自貴爾。於我何加焉。賤自賤爾。於我何損焉。生遇物以誠。三尺之童。莫之敢欺。或譏其同。生曰。我道蓋如是。同不同弗知也。生不享外神。唯事其先甚謹。或謂其報本耶。生曰。非惟報本也。以氣感氣。吾先以之。外人何預哉。生多讀台衡賢守慈恩諸家書。或謗其偏。生曰。我雖口之。未嘗心之也。何其偏。生當情意調適。輒懸特磬於簾。親擊以鐵鑊。瞑目側耳而聽。自以爲達制樂之原。或笑之。生曰。此黃桴土鼓之遺聲也。五音繁會則未矣。生好著屐登山。遇境勝處。注目視弗釋。或惡其癖。生曰。吾於澗容川色。見三代之精華。不忍舍也。生年四十有六。髮無白者。日坐一室中。澄思終日。或執筆立言。動以

賢聖自期。其中之所存者。人固莫能識也。適有畫史。貌生之騎白牛者。生大笑。以爲得其真。故自疏其事如左。曰。白牛生傳云。贊曰。

生妄人也哉。言其文弗能成章。言其道則又邈乎未之見也。猶自語諸心曰。我學古人。我學古人。不亦悖且戾乎。

鄭氏孝友傳

鄭綺。字宗文。白麟二十一世孫也。其先居滎陽。凝道遷歙。自牖遷睦。淮遷浦陽。今爲浦陽。感德鄉人。淮綺之祖也。綺通春秋。穀梁學。撰合經論數萬言。事父母孝。父照。以非罪繫獄。當入死。綺上疏郡守錢端禮。請以身代。端禮察之。白其誣。母張病風。擊綺保持。若嬰兒。袒適廁。必抱就之。三十年不懈。綺生聞。聞生運。運生政。政生德珪。德璋。至元中。仇家傾德璋。以死罪將械送揚州。德珪毅然代其行。德璋泣隨之。爭欲赴吏。德珪竟以詭計先死之。德珪生文嗣。自綺至文嗣。凡同居六世。歷二百年。咸如綺在時。至大二年秋九月。鄉老黃汝霖等言於縣。縣上其事。廉訪使加審按焉。文達中書禮部。四年春二月。準式旌表門閭。文嗣生鑑。鑑生渭。渭生挺。皆善守。合數千指。無異心者。重紀至元元年冬十二月。太常博士柳貫與鄉校羣士。又上狀。請如故事。復其家。從之。初。文嗣旣沒。德璋子大和司家事。嚴而有恩。雖家庭中。凜如公府。子弟稍有過。頰白者。猶鞭之。每遇歲時。大和坐堂上。羣從子皆盛衣冠。鴈行立左序下。以次進拜。跪奉觴上壽。畢。皆肅容拱手。自右趨出。足武相銜。無敢參差者。見者喑喑嗟慕。謂有三代遺風。雖石奮之家。亦所不及。名聞

天下自大丞相及臺院諸公卿多賦詩美其行。部使者武威余闕行縣以其孝友。七郡或莫之先。書東浙第一家以褒嘉之。皇太子在青坊聞其事而歎曰。此國家之祥瑞也。復親御翰墨畀以鳳麟二大字。翰林學士承旨歐陽原功爲之贊。勒石以傳。大和性正方。不奉浮屠老子經像。冠昏喪祭必稽朱熹家禮而行。子孫從化孜孜孝謹。不識慶市嬉戲事。執親喪哀戚甚。三年不御酒肉食。食貨田賦之屬各有所司。無敢私。凡出納雖絲毫事咸有文可覆。浹日則會。不公則監視發之。諸子晝趨功。入夜輒坐棊華軒中。溫溫語笑。至更餘始休。雖多列顯仕。或入侍經筵。出持使節。不敢挾此有一毫自驕意。諸婦唯事女紅。不使豫家政。宗族里閭以恩懷之。各有差。內外極嚴。輿臺通傳不敢越堂限。家畜兩馬。一出則一爲之不食。人以爲行義所感。有家範三卷傳於世。贊曰。

史氏之言多有不足取信者。濂少時嘗讀唐書宰相世系表。謂白麟之後不傳。私竊信之。及觀司空圖榮陽記。則曰白麟生師慎。師慎生懷芬。懷芬生鄧。鄧生斌卿。斌卿生唐。青州刺史庶。庶生侍中徽。徽生大理卿。鄒生鱗。鱗生給事中蕃。蕃生宣州觀察使回。又觀鄭燮生遂安譜。則曰回生弘。弘生垣。垣生倕。倕生子襲。子襲生扈。扈生宋歙縣令凝道。凝道生殿中侍御史自牖。自牖生祕閣校理安仁。安仁生淮。淮生照。照生冲素處士綺。綺卽傳之所書者也。其承傳次第灼灼可信如此。惡覩其所謂不傳者哉。考徵不廣而欲以一人之見聞定百載之是非。難矣。

此傳作於至正初。已刻浦陽人物記孝友篇中。近板毀於火。因重鈔於此。以勸民俗云。

吳德基傳

吳德基者名履。婺之蘭溪人也。其父景奎。故爲儒。鄉人師尊之。酷好爲詩。遊山澤間。方苦吟而雨至。雨滂其衣。弗知也。德基少受學。聞人先生夢吉學春秋。俊邁有奇材。長通諸史。爲文辭。願學司馬遷。班固。最好書。尤工行草。得之者藏。弄爲榮。元季教授鄉里。名動一時。國朝取婺。李曹公文忠爲浙東省左丞。聘德基爲郡儒學正。李公數與語。知其才。辟爲掾。稱疾而辭。有司舉於朝。爲南康丞。南康俗悍。其民以爲丞儒者也。易之。德基自如。數月。皆周知其情僞。有所發擿。一縣驚伏。德基乃更以寬化之。視民如子。民有訴。召使前與語。弗加咄叱。民或援丞裾。相爾汝。弗責也。有徵調。召其大姓。坐之廡下。好言誘之。聽人人自說。便否。由是民愛丞如父。而吏卒不能爲姦。民王瓊輝。仇里豪羅玉成。執其家人挾法笞辱之。玉成兄子玉汝。怒集少年千餘人。圍王氏家。劫奪家人歸。且縛瓊輝。連道箠之。至家解衣箠。殆死。乃釋去。瓊輝兄弟五人。庭訴。辭指出血。誓與羅氏俱死。德基念成獄。當連千餘人。勢不便。乃召瓊輝語之曰。獨羅氏圍爾家邪。對曰。千餘人。曰。千餘人。皆辱爾邪。曰。數人爾。曰。汝憾數人。而累千餘人。可乎。且衆怒不可犯。倘不顧死。盡殺爾家。而就逮。雖有司有法。汝悔何及邪。瓊輝良久曰。吾恨羅氏。欲快吾憤爾。惟明公所命。德基乃捕操箠者四人。於瓊輝前杖數十。血流至踵。命羅氏對瓊輝引罪拜之。事遂止。兩家皆叩頭曰。公弭我事。德甚弘。咸願有所上獻。德基卻去。縣令周以中。初至。召民轉輸。至郡不得。躬至鄉。召之一民逸去。命卒笞之不肯伏。走入山。罵令曰。官當在縣。何以至此。爲令怒。吏卒因以語動令。欲誣一鄉民。圖賄利。獲六七十人。下獄。局鑰

甚嚴。卒方往捕未返。鄉民大駭。音駭德基計民無罪。自出巡獄。叱卒釋之。卒以他辭解。德基槌碎獄門。遣之曰。若無罪。還告父兄無恐。乃往告令。令怒曰。民無道。衆辱我。君乃釋之。何輕我。至是耶。德基曰。犯使君者。一匹夫爾。其鄉人何罪。且法乃天子法。豈使君解怒具乎。令意慙乃已。其俗好淫祀。有蛇出戶限。民怪之。以爲神。至奔走祠之。德基罪神巫十人。投其主江中。爲丞六年去。知長沙之安化。去三月。他吏用法急。南康民作亂。命師討平之。死者過半。南康民泣曰。我吳君在。寧有此禍乎。安化鄰古三苗。其土豪多糾民爲兵。旣盡降。萬夫長易俊原獨恃驍勇。與麾下數十人。遁入山谷。保險自固。郡邑患苦之。江陰侯吳良承詔求餘寇。已移檄旁縣。兵且集。召德基計事。德基曰。易氏未有反狀。奈何激之使生變乎。不若先以計致之。果反。用兵未晚也。否則出兵無名。民先受其害矣。願君侯熟慮之。侯曰。令之言然。吾爲令除之。德基乃屏吏卒。步至山谷中。抵俊原家。家空。一老人出對客。德基謂曰。易俊原出見江陰侯。則無事矣。今不出。大兵且至。一縣民皆爲齏粉。然殺一縣父兄弟者。易俊原非縣令也。老人曰。俊原必出。惟明府哀憐之。德基謬曰。俊原或未肯來。得其子及麾下三四人先往。可免矣。明日。其子及麾下至。如德基言。兵止不發。旣而盡致其麾下。惟俊原一人度兵勢孤。乃招之曰。君侯願與俊原相見。俊原喜。詣軍門。請見。遂縛送京師。事平民安堵無擾。江陰侯檄取故兵之爲農者。民咸自疑驚。奔相告。勢甚危。德基屬耆老諭民曰。侯所取者兵。民無與也。籍其願爲兵者數人而止。長沙郡令造戎衣。德基力爭曰。吾邑民貧而俗暴。恩之且恐其叛去。安可責以事功。如他縣乎。令格不奉命。其罪小。奉命而致亂。其禍大。決不敢辭小罪而蹈大禍也。郡從

之。凡有徵徭。皆不使之與。越三歲。入朝。擢知萊之濰州事。民畜官驢四十匹。萊守核其孳息狀。與籍不合。曰。驢當歲產駒。今幾歲。宜得幾駒。乃何少也。欲責欺罔罪。而徵其償。諸縣皆已勒民買驢。德基獨戒民勿償。守怒。問德基。濰不償驢。何辭也。德基曰。民實不欺妄。烏可責其償。國家富極海內。爲吏者宜宣布德澤。爲民除疾苦。寧少數匹驢耶。守語塞。德基因畫不便者數事。守不敢復言。并諸縣已償者皆罷之。山東民願以羊牛代秋稅者。官從其言。德基與民計羊牛。後有死瘠患。不如納粟便。獨收民粟。他縣牛羊送陝西。民驅走二千里。皆破家。郡以濰獨完。令役千人。部送鄰縣牛。德基列其不可。曰。有牛家送牛。雖勞不敢怨。使人代之。脫道中牛死。誰當代償耶。力爭不奉命。德基爲吏。不求威民。以愛民爲先。尤重獄事。凡有訟。召受訟者。面直之。釋其怒。乃已。不忍置民於獄。獄屬空。當有追需於民。不務速辦。稍緩其期約。故物價不湧。民視他所費。恆減十二三。所至民樂其簡易。而感之。以爲愛己。居濰二年。會改濰爲縣。召還。濰民遮門。抱其足。泣拜曰。自得吾父。濰民膚無笞癢。今舍我去。願得隻履事之。以慰我思。其得民心如此。德基至京師。遂謝事歸。將行。辭其友翰林學士宋濂。濂爲德基交甚狎。時亦致仕將歸。呼德基謂曰。若願受長者教乎。德基曰。唯。何以命之。濂曰。天子官汝五品秩。乞骸骨歸。恩甚大。汝知保之道乎。德基謝曰。願卒教之。濂曰。慎毋出戶。絕世吏。勿與交。吾之教子。無以加於此矣。德基至家。如濂戒。君子多其能受善言云。太史公曰。世俗恆謂儒者少功。顧非儒者爾。湯之興。以伊尹。周之興。以周公。此獨非儒者耶。何其功之大也。彼世之儒者。其號則同。其誦說則同。其所操守者。異於伊尹周公者多矣。豈特少功哉。謂之不足用可也。然其

間有足用者不可誣也。俗吏以嚴急督責爲足用。謂儒者爲儒緩債事。而不知得民者非儒不能也。以子觀於吳德基。恂恂不大聲色。而衆庶安其政。旣去而思之。視世吏之督責者。果孰多耶。德基之政。固世俗之所笑者。而其心誠愛民。有足取焉。古所稱平易近民。豈弟君子。非德基之謂耶。所謂難與俗人言。其此類耶。

朱環傳子元女壽

朱環字君玉。婺之義烏人。漢槐里令雲四十代孫也。赤子時。無兒唬聲。仲父桂奇之。養爲子。桂後生璧及定周。因外環。環益孝謹。凡勞事皆服行。不知有寒暑。時境內多盜。白晝出道上劫人財。桂有金數百兩。與璧謀。瘞窖中。璧夜發去。反誣環所爲。桂怒。褫環襦袴。立之大雪中。一日夜不使去。環恂恂謝過。無一言辨。其冤。桂猶日虐環。五六年間。瀕死者數四。恆順受之。不怒。桂死。遇璧益厚。璧子慶多暴。或遂嫁以殺人罪。環憂不能食。竭私財救之。慶獲免。環善讀書。寶祐間嘗舉進士。年八十六。終於家。子元女壽。

元字子初。性警敏。絕人。至元末。有盜數千起。緝雲。過永康。置砦峽源山。山抵元家。甚邇。盜將劫元父環。兄遇魁爲謀帥。元聞。遽歸告二翁。速避寇。不聽。復涕泣諫。翁罵曰。豎子不解事。江南內附久。誰敢叛耶。設有寇。不過鼠竊狗偷。何足病。元自度賊若縛翁去。則是翁從賊反。官坐以法。雖有百喙。莫能白。爲今之計者。孰若殺賊自明。乃與役夫傅參謀。執刃伏垣下。或止之曰。賊勢張甚。汝不畏作菹醢耶。元曰。吾知有親爾。若得白親以無罪。雖萬死不恨。會賊偵騎至。竟斫殺二人。梟首市中。以血手入示翁。負之北逃。賊平。翁竟

無罪。

壽生有淑姿。年既長。歸金華戚象祖。台寇楊鎮龍反。西攻婺州。宗王璽吉將及浙東。宣慰使史弼捕獲之。械至州城。將鞠其反狀。壽父環有亡奴在械中。奴嘗怨環。搥傷。欲連環出。貸助鎮龍。時史怒寇甚。凡獄辭所引。必盡殺。乃止。環子元疾病不能起。乃視壽泣。壽曰。昔緹縈能救父命。我獨非人耶。乃走告法曹掾馮耿賢曰。妾父無罪。亡奴欲誣以不道。倘事不得直。一家枉作泉下鬼。聞君素長者。獨不能相活乎。言訖。淚如雨。馮怒曰。此事豈汝女子所知。壽哀祈益切。馮爲惻然良久。揮壽去曰。爾但歸。吾知所處矣。明日使吏椎碎奴口。不果誑。贊曰。

昔尹吉甫子伯奇無罪。爲後母譖而見逐。履霜中野。作履霜操。其辭多怨傷。濂竊謂伯奇不必爾也。父母惡之。勞而不怨。何假於辭哉。今環之無罪。與伯奇同。環羸身立大雪中。則又非若履霜比也。乃能順受之。而無怨。不賢而能之乎。古之所謂純孝者。環蓋近之矣。元爲親故。拔劍斫賊。而不知有身。壽雖女子。亦能脫父命於虎口。皆環身教之然也。人之行莫大於孝。孝有如環之父子。可使無聞哉。因具列之於篇。

白鹿生小傳

白鹿生者。諸暨之人也。風神峻爽。翹然欲超羣。其外族曰方。建塾聘賢。傳館四方。遊學士。生往受諸經。領其玄旨。稍事文墨。輒峻潔如淵珠。衆譁曰。生賦資絕倫。非積功所可及。盍遜其一席地。聲光流婺越間。煜煜能動人。競要遮。作州閭師。類弗應。浦陽江上有鄭氏一宗。累五十室。同案而饋。戒子姓執贄致辭。生躍

然興曰。是或可爲也。卽日上道。皋比中居。以倡道爲己責。與諸生言。必稱曰。昔之人。昔之人。日摩月切。操行有可觀。歷十春秋。自以精明不逮前時。退居白鹿山。戴樓冠。被羊皮裘帶。經畊烟雨間。暇則吟風弄月。傲睨萬象。若不知古今之殊軌。有識者莫能窮其際。高郵樂鳳來爲州牧。獨造門拜曰。鳳聞先生賢。言行無悖古先哲人。願爲一州學子師。生牢讓不起。鳳不得已。令閭右子弟卽其家問道。州政有闕失。鳳必移書諮訪。生白以利病。裨助恆多。後若干載。殿中侍御史唐鐸出守越。欲辟起之。生力辭如前。鐸不敢強。生性醇篤。無銖髮矯僞。與人語。出肺肝相示。恥爲覆藏。事乖名義。峻言斥之。弗少怨。家無儋石儲。臨財甚介。山氓誤坐法當死。生憫其蠢愚。謀諸鄉鄙活之。氓輟烏犍爲謝。生拒之。氓頓顙於地。潛然隕涕。生曰。東作方興。非牛何以畊。俟三冬或可爾。至期。氓復來請。生反覆譬曉之。乃已。州人士求連生族。祝生持其成。暨委禽走介繼以金幣。生笑曰。孰謂君子而可以貨誘乎。悉遣去。人復譁曰。是可以義取者。生尙不之欲。況其他乎。於是鄉人教子者。恆指生爲法。使學焉。生名恆。字本初。姓楊氏。白鹿生因其所居號之云。史官曰。余與生遊者三十年。不可謂不相知者。待罪國史時。遂白執政。薦之入成均。聞生不受州縣辟。事乃寢。然其行義可法者。不當使其泯泯。因爲造小傳如右。隱之與顯。非所以論生也。

王先生小傳

王先生毅。字剛叔。其先自琅琊徙居處之龍泉。至先生十有三世。世爲農。初西隣有王氏子。事身奉神甚謹。嘗斲木爲拜。其當額處成窪。母某氏有妊。夢王來而誕。在赤子時。頗異。遇浴及手足露。皆怖而哭。姑懷

之則止。頭患瘍。母惡其臭。卷木葉掩鼻。當乳時。閉目弗之視。痲疾大作。身熱如火。熾榻。懸繩代櫛。無風繩自搖。及能言。備陳入浴時。如蹈大海。茫無津涯。風入手足間。痛若刃割。姑衣有績。能覆之。乃安。木葉氣烈不可近。熱弗能禁。神出戲繩上下。視一小兒僵臥。心知其爲己也。熱退。乃復還。人咸奇之。六歲知好書。家單不能致。每借市中。一誦輒能記憶。稍長。所嗜益深。父機命牧牛。掛書牛角而讀之。隨牛而東西行。日入忘歸。復使之視春溪濱。挾冊坐轡車側。米成粉不悟。父怒逐之出。世父與明憐之。爲代償其米。且令聚徒教授。束修之供。悉以購書。積至萬餘卷。精思疾讀。唯恐其盡。夜分燈灺。猶聞其吟諷聲。或至達旦不寐。因觀周子太極圖說。歎曰。此升聖域之階梯也。人心與上堪下。與同大局。於一藝可乎。會上饒鄭君原善來。爲郡錄事。先生往質所疑。鄭君甚器重之。已而往謁許文懿公。謙於金華山中。公爲詳陳理一分殊之旨。先生豁然。如夢斯覺。居久之。絕淮泗。泝黃河。而觀泰山。鳧釋之雄。徘徊闕里。悵然有千載之思。遂北至京師。薦紳先生若黃文獻公潛。揭文安公僊斯。翰林承旨學士歐陽公原功。參議中書危公素。爭相引重。聲譽翕然。至有薦爲檢討。經筵編修翰林者。先生皆引分固辭。俄南還鄉里。益以躬行實踐爲教。其發明本心之學。至利欲沈冥處。多有感泣者。一邑化之。雖大山長谷。愚夫愚婦。皆知畏慕。革心從善。縣饑。先生告令曰。民饑且死。大夫其得奠枕而臥乎。卽語以勸分之法。閭右之家。計口賦之食。餘粟盡乞貧民。全活者以萬數。父老見先生。拜且泣曰。我等皆白骨也。而先生人之爾。至正中。荆襄兵起。掠七閩。直犯縣南。鄒先生畫八策。贊將軍石抹宜孫破之。仍不遠萬里。遣其徒上書行御史臺。以明將軍之功。未幾。盜發青

田揚言來攻。縣長吏寶忽丁遁。盜遂深入。焚官舍。汙人女婦。剽鹵至雞犬。先生召門人章溢。季文謂曰。吾豈忍以良民畀豺兕乎。溢等曰。唯先生命。乃部勒鄉民爲兵。逐殺羣盜。大府錄功。賚之以金幣。先生曰。得選賢令以撫創殘民。則毅拜賜侈矣。謝不受。俄部使者下令正丁罪。丁恚。集季溪惡少年。據險阻。以方命首害先生於家。縣人無少長。皆痛憤灑泣。以復讐爲事。弟子胡深方參軍事鄱陽。急馳歸。與同門友告諸方伯連率。帥師翦平之。越二年始平。葬先生蓋竹鄉之西山。別建祠而尸祝之。先生爲學。深見天地萬物一體之竟。視衆氓之顛隤。如己病之。苟力可救。雖銖銖鼎鑊在前後。有不暇恤。至於禽魚之微。不得其所。亦爲蹙額弗寧。思遂其生。然疾惡如仇。遇有賊民吏。切齒扼腕。流涕太息。必疏其姦狀。鋤而去之。豪民制鉅量以入粟。亦叱使減去。以合常度。小人不便爲惡。時欲加害。賴上官察之。獲免。生平不食君祿。其尊主庇民之念。夢寐不忘。武威余闕公持節浙水東。廉知之。謂其卓行不讓古人。性不溺文辭。歎曰。當今之世。何能文者如牛毛。而植德者若麟角。盍亦知重輕乎。人有求者。揮毫立就。亦淵然有奇氣。可誦。自幼不苟葷肉。雖強之食。終弗能下咽。間居斂容澄坐。多至夜中。或倦極目瞑。鼻息雷鳴。坐客未寢者。談辨蠶起。晨興。先生各能記其言。而折衷之。其神全而不亂如此。歿時年五十二。娶樓葉二氏。無子。以兄子彥荀爲後。扁書室曰木訥齋。人因稱爲訥齋先生云。

太史氏曰。昔者山陽殷子通。以儒術教授里中。人薰爲良善者衆。及隣境寇作。子通帥弟子起兵殲之。長吏惡攘其功。使人殺子通。門生毛術。手刃殺者。梟首以甘心焉。君子多其義。其事與先生絕類。雖然。先生

以明體適用之學保障鄉縣。使三十萬蒼生去危卽安。非子通比也。固不幸遇難而死。諸生爲師復讐。兵屯二年弗解。卒尸鼠輩於市。功比術爲尤難。祠宇之建不建。又在不論。由是而言其義。不益多歟。嗚呼。先生道德之化。蓋亦入人深矣。

杜環小傳

杜環字叔循。其先廬陵人。侍父一元遊宦江東。遂家金陵。一元固善士。所與交皆四方名士。環尤好學。工書。謹飭重然諾。好周人急。父友兵部主事常允恭死於九江。家破。其母張氏年六十餘。哭九江城下。無所歸。有識允恭者憐其老。告之曰。今安慶守譚敬先非允恭友乎。盍往依之。彼見母念允恭。故必不遺棄。母如其言。附舟詣譚。譚謝不納。母大困。念允恭嘗仕金陵。親戚交友或有存者。庶萬一可冀。復哀泣從人。至金陵。問一二人無存者。因訪一元家所在。問一元今無恙否。道上人對以一元死已久。惟子環存。其家直鷺州坊中。門內有雙橘可辯識。母服破衣。兩行至環家。環方對客坐。見母大驚。頗若嘗見其面者。因問曰。母非常夫人乎。何爲而至於此。母泣告以故。環亦泣扶就坐。拜之。復呼妻子出拜。妻馬氏解衣更母溼衣。奉糜食母。抱衾寢母。母問其平生所親厚故人及幼子伯章。環知故無在者。不足附。又不知伯章存亡。姑慰之曰。天方雨。雨止爲母訪之。苟無人事。母環雖貧。獨不能奉母乎。且環父與允恭交好如兄弟。今母貧困。不歸他人而歸環家。此二父導之也。願母無他思。時兵後歲饑。民骨肉不相保。母見環家貧。雨止。堅欲出。問他故人。環令媵女從其行。至暮。果無所遇而返。坐乃定。環購布帛。令妻爲製衣衾。自環以下皆以。

母事之。母性偏急。少不愜意。輒詬怒。環私戒家人。順其所爲。勿以困故輕慢與較。母有痰疾。環親爲烹藥。進七筋。以母故。不敢大聲語。越十年。環爲太常贊禮郎。奉詔祠會稽。還道嘉興。逢其子伯章。泣謂之曰。太夫人在環家。日夜念少子成疾。不可不早往見。伯章若無所聞。第曰。吾亦知之。但道遠不能至耳。環歸半歲。伯章來。是日環初度。母見少子。相持大哭。環家人以爲不祥。止之。環曰。此人情也。何不祥之有。既而伯章見母老。恐不能行。竟給以他事。辭去不復顧。環奉母彌謹。然母愈念伯章。疾頓加。後三年。遂卒。將死。舉手向環曰。吾累杜君。吾累杜君。願杜君生子孫。咸如杜君。言終而氣絕。環具棺槨。殮殯之禮。買地城南鍾家山葬之。歲時常祭其墓云。環後爲晉王府錄事。有名。與余交。

史官曰。交友之道難矣。翟公之言曰。一死一生。乃知交情。此非過論也。實有見於人情而云也。人當意氣相得時。以身相許。若無難事。至事變勢窮。不能蹈其所言而背去者。多矣。況旣死而能養其親乎。吾觀杜環事。雖古所稱義烈之士。何以過。而世俗恆謂今人不逮古人。不亦誣天下人哉。

詹士龍小傳

詹士龍。字雲卿。光之固始人。父某。宋開慶中都統勇勝軍守鄂。以偏師巡渠巴諸州。與元兵戰南平。身嬰九創。被執。發憤不食。卒。元兵破鄂。降其軍。士龍生三歲。同母胡氏北遷。董忠獻公文炳以其父忠也。鞠爲子。文炳長子名士選。故命其爲士龍。飲食衣服。一視諸子。外人不能辨。諸兄忌之。罵曰。客兒見幸。乃同我輩耶。士龍不知其故。泣訴文炳。文炳曰。爾眞吾子。飛語慎毋聽也。士龍哀祈益切。文炳頗漏言。士龍晝夜

流涕欲復詹爲姓。受文炳卵翼恩深，未敢言。一日獵滹沱河，遂陳前志。文炳戲曰：爾投石水中，石浮，吾當爾從也。左右皆笑。士龍仰天祝曰：天若不絕詹氏，石當浮。因投石水中，石盤旋急流中。若沈浮者數四，文炳以手拍鞍曰：詹都統之靈，其不死乎！卽令士龍復詹姓。文炳薨，爲服齊衰三年。歲時祭祀，必先設神主。率家人奠之。士龍後用文炳弟文忠薦，爲高郵興化尹。士龍修築捍海堰三百里，數郡利之。初發地，獲范希文石記曰：遇詹再修，事蓋前定云。轉兩淮都轉運鹽使司判官，改淮安路總管府推官，拜江南行臺監察御史。時姦臣柄國，虐餓方熾，士龍上章劾之，未幾，事果敗。士龍退隱興化葺草堂德勝湖上，若將終身。朝廷念其老成，以廣西廉訪僉事起之。居二年，鬱鬱不樂，乃移疾而歸。年五十八卒。子澍，岳州華容尹。文炳妻以從女，實因前好云。

史官曰：精誠之格，將何所不至。上致日星之應，下召物產之祥，古則有矣。今觀士龍投石之事，其惡可不信哉。或者致疑天人之間，視之若茫然不相通過矣。予總修元史時，有司不以聞，失於紀載，因徇其孫壻余文昇之請，刪其墓志，爲小傳一通以傳。

孝子丘鐸傳

丘鐸，字文振，汴之祥符人。故御史中丞劉基先生弟子也。通儒書，兼習醫家言，流聲動一時。至正末，父誠爲湖廣等處儒學提舉，鐸侍母馬夫人留吳越，欲御車往從。江右兵大起，武昌陷，二浙繹騷，鐸憂懼不知所爲，急避地四明，暨江南皆歸職方。復奉母至南京，每西向翹首曰：武昌有來者，庶幾知吾父之所在乎。

已而其父果至自武昌。父子相見，悲喜交集。鐸賣藥市中，以自給。親驢然忘其貧，曾未幾何，母弟鈞擢會稽上虞巡檢，鐸與父母皆同赴官。夫人疾，鐸晝夜泣禱，上下神祇，乞以身代。及歿，鐸哀慟幾絕。卜葬鳴鳳山之原，哭曰：鐸生也，咫尺不離吾母膝下，今逝矣，可委體魄於無人之墟乎？乃結廬墓側，朝夕上食如生時。當寒夜月黑，悲風蕭颯，如臨鬼神。鐸恐母岑寂也，輒巡墓號曰：鐸在斯，鐸在斯。其地多虎，聞鐸哭聲，輒避去。故會稽人異之，稱爲真孝子云。先是，鐸在四明，從祖父母居汴者八年，貧不能自存，鐸咸迎養之。死皆返葬先塋，人以爲難。其姑適河南匡氏者，年十八夫亡，誓不再適。鐸義之，養其終身。凡二十年如一日，然其制行峻絕，他皆類此文，不能盡載也。爲說者曰：予聞鳴鳳山，當白馬上妃二湖間，人跡罕至，白晝虎狼旁午，鐸煢然獨處，心無畏懼者，豈不以親之體重於身乎？然身者親之枝也，可不敬乎？敬其身，斯孝其親矣。鐸情固迫切，當知以禮自節哉。當知以禮自節哉。

危孝子傳

臨海孝子危貞昉，字孟陽，事親以孝聞。其父孝先，洪武辛亥進士，擢官麟遊丞，再遷陵川，坐法謫役浦江縣。貞昉時爲郡諸生，聞之，奔訴於郡守，欲走代之。守以其名隸學籍，難其行。貞昉號泣於庭曰：人孰無父哉？奈何獨沮於我也。左右爲之言，獲如其請。卽日上道，詣京師，伏闕上疏曰：臣父陵川丞孝先，不幸絀吏議，輸作大江之濱，筋力向衰，不能執事，而大母范氏，春秋復踰九十，旦旦念之，恐染霜露之疾，無以遂其菽水之忱。終天之憾，或及其身。臣犬馬之齒，方殷，願代父作勞，使其歸養。雖卽死無恨。聖天子以孝治天

下。惟哀矜焉。疏奏。上惻然從之。貞昉乃解儒衣。易短製。欣然就役。施施無難色。然質體羸弱。不勝負任之苦。越七月病卒。貞昉通周易。兼能學唐人歌詩。性剛直。讀古忠孝事。斂衽久之。且曰。使貞昉生其時。亦當若是爾。遇交友患難。蹈湯火赴援。不爲利害惑。卒時年二十八。聞者皆悲之。爲說者曰。父子體殊而氣同者也。故古之孝子。不以身自私。非過激也。宜也。有如貞昉者。詣闕上疏。欲代父受役。毅然以死自誓。唯知有父而不知有身。其殆近於古之孝子者。非邪。嗚呼。死生於人大矣。貞昉之死於孝。是有益於天衷民彝之重。無愧於俯仰。無慊於神明。奚翅足矣。他尙何說哉。彼悖德犯上者。亦曷嘗不死其死也。如敗豚腐鼠。人孰稱道之。吾觀貞昉。則若威鳳之翔千仞。可望而不可卽。得與失又爲何如哉。貞昉之名宜登國史。以風厲四方。余舊史官也。特爲立傳。使秉直筆者。他日有采焉。

瞿孝子傳

瞿孝子嗣興。字華卿。蘇之常熟人。父達元。初爲百夫長。遷蘇州巡鹽大使。兼管內六縣捕盜。轉怯憐口提領。母某氏。孝子天性純慤。依依親側。若不忍斯須釋者。母患癰。癰潰。當長夏。臭穢不可近。孝子燻湯洗滌。執扇驅蚊。納靡晝靡夜。至月餘乃休。旣而又罹積氣疾。衝擊下上。百藥不治。或授以割股可療法。祝刀於天。俟刀躍方可用。孝子頓顙流血。刀弗動。孝子情迫切。強取刀割股肉。作羹以進。母不食已五日。忽盡啖之。氣銷如失。一旦母思芟食。時芟始華。孝子求諸市不獲。凡川有芟者。解衣入水。歷覆其葉。覓之。雙脛皆赤腫。孝子號呼曰。神胡不相我乎。俄得三芟水中。人以爲精誠所感。然其宅心仁厚。單窶者必思賑給。而

不欲使其知。氈工王氏家無儋石儲。且臥疾不能興。雞初鳴。孝子往其門。以錢二十緡投窗隙而去。民有告糴者。鶉衣百結。孝子受其直五千。復陽問曰。吾性多忘。若欲糴十千耶。遂如數與之。鬻蔬翁過門。孝子市錢五十文。以楮幣五百文授翁。令補餘錢。翁慍而辭。孝子曰。汝第持去。他日見還。未晚也。負販夫或來貿遷。孝子一聽其言。不與較。家人怪之。孝子曰。彼竭汗血。以逐什一之利。寧能足吾欲乎。歲大儉。來相依者數十人。孝子擇旁近舍舍之。會癘氣作。病者相枕藉。孝子每晨躬攜粥藥撫視。卒賴以全。孝子朝出道中。拾遺囊。孝子悉歸求者。一金不自私。未幾。又有亡契券及白金者。孝子蹙額曰。白金固易致。質劑乃資業所憑藉。其必起爭端乎。密偵其人還之。其人勢家奴。因失主物。畏懼幾欲死。謝曰。三尺微命。孝子所賜也。孝子雖不讀書。其篤行類鄒魯士。州里翕然稱之。孝子年且耄。見令子莊宦學有立。洪武初。擢禮部員外郎。喜動顏色。其後病且革。言不及家事。惟曰。死生恒理爾。煩語吾兒莊。善事聖天子。毋以老身爲念也。遂終。

史官曰。濂待罪禁林。日與莊爲同官。莊念父在遠。一語及之。涕泗漣然流。濂因歎曰。非誠心愛日者乎。已而蘇人來言。孝子之賢。絕於醜夷。有未易追躡之者。濂又歎曰。非是父焉。能有是子。傳所謂以身教者。孝子其庶幾乎。是有關世教民彝之大。故造冊孝子傳。使圓冠方履者讀之。必將惕然而自省矣。

孫孝子傳

孫孝子諱惟中。字伯庸。濰州昌邑人。祖明。父琳。世爲農。孝子朝出耕。夜歸讀古人書。性雅愛宋名臣言行。

歷歷能道之。凡所謀猷，恒取以爲則。年及壯，用推擇爲寧海州吏。一年貢益都府，瀕行，會父卒，皇皇如欲無生。縣有漢昌邑王廢城，舉柩葬城中，結菴廬其側，藉苫以居，曠野無人，深夜月冷，哭聲依稀，隨悲風遠聞，人爲泣下。日啜淖糜二盂，卻酒肉弗御，晨起無火，掬雪頰面，輒詣墓前拜。久之，手足皸瘃，形容蕉萃，甚或勸其還，哭而不對。閭師韓泰亨帥闔巷民言於縣，縣尹戴友諒弗之信，將廉之。伺夜半，攜二蒼頭出風雪中，抵菴廬而聽。孝子聞足音，遙問曰：「暮夜欲何爲？」戴歎息而去，以爲不讓古人。亟上之府，部使者加覆察如縣言，請旌其門。文達中書，禮部不報。孝子長身美髯，善談古今事，遇子弟若嚴師，家法著於井落，多效之。娶劉氏，從孝子之化，居舅喪，亦不近酒肉三載，生三子，尙志、尙文、尙德，尙志業爲儒，今禮部主客主事云。

史官曰：李瓊據益都，明被兵掠至洪溝，去家三十里，年始十歲，兵以其童也，易之。明夜遁，俚俚亂行，有老父教之曰：「兒但從吾指以往，卽至家矣。」明如其言，走固隄鹽場中，草深滅頂，而豺狼左右嗥，明竟得還。父母亦避兵方歸，舉燈索明不得，相向哭，燈忽作花，復自相慰曰：「我兒其返乎？」不然，此花何徵也。言未訖，忽聞叩門聲，啓視之，明也，亟挽以入。初，父止生明，今明之子孫逾四十人，而惟中又孝行，卓卓如此。天之不絕孫氏者，其有以哉。其有以哉。

周賢母傳

周母王氏，名妙貞，括人。祖德潤，父思齊，辟爲州縣吏，生十齡，見父有感容，問曰：「家業幸粗給，大人當開口。」

笑樂。何乃自鬱鬱邪。父曰：此事非爾女子所知。吾所掌獄案。死者欲生之不可得。故弗悅爾。王氏曰：名教自有樂地。何不棄之。復溫繹書詩邪。父曰：不意女子能發斯言。吾之意正如此耳。即日揖上官去。人賢之。瀨嫁。父欲厚其裝。環珥盤帨之屬。無所不飭。王氏視之。澹如。出示二女弟。恣其所取。既歸。事君舅。君姑盡禮。處娣姒之間。恒欣欣然。或主中饋。身先之。不專役。賸人。鄰有寒餓及喪禍。輒周其急。歲壬寅。山寇作。避地魯峯。顛惡少年欲來侵掠。王氏偵得實。遣人擗其姦。盜驚而潰。其母項。因世亂來依。極力奉之。以悅豫其心。王氏嘗嬰疾。衆醫束手。謂不療。忽夢老父與易氣。及覺。氣騰騰從頂升。浹日絕粒不食。已而復夢。氣來復。疾頓瘳。識者謂爲神助云。其夫則周世英。生男女各二。女皆有所歸。男曰荃。曰茂。茂有文學政事。出仕矣。王氏年今七十云。

金華宋濂曰：予嘗從史官之後。遇人有善者。必謹書之。將以誘民衷而樹世防也。有如周母能成父志。推孝於尊章。出其餘智。亦足破雀鼠輩之姦。其中必有大過人者矣。於戲賢哉。賢而得書。亦春秋之法也。

二賢母傳

瑞安有大姓曰吳氏。世守禮度。而嚴於昏媾。柳州教授挺。生子欽。年近弱齡。挺欲爲之擇配。久且未成。或曰：同郡胡節有容德。且達宦之後。可室也。乃遣行媒。知名節之父悅焉。六禮既備。故節來歸於欽。內外宗暨媪御而下。宜之。生子璟。鞠育至長。爲娶縣人林廉。廉名卿孫。粗習書傳。矧躬然勤。翼翼然抑畏。節愛之不翅若親女。廉亦事節若母。懷妊九閱月。璟以病死。未死執廉手。涕泣惓惓。以養親存孤爲託。廉諾之。後

三十日廉生一男子且悲且喜曰吳氏之宗其不爲敖氏餒鬼乎未幾欽亦卒節與廉蓬首垢面自稱曰未亡人誓撫遺孤以不墜其家後六年元政日紊四方寇盜蠭起市魁都伯各聚農爲兵陽號保障陰則倚藉爲姦有利吳氏多貲欲奪廉之志廉年二十有餘爾善自閉拒不可撼遂有謀殺其孤者廉懼棄家挾姑而遁擇隣境大山匿焉艱難備嘗室如懸罄無絲毫怨愆意惟飭厲兒以學無有寒暑晝夜年三十九卒節撫棺哭泣竟欲無生益督兒事書詩勿怠又二年節亦卒兒名荃今爲巨儒州人識與不識咸稱爲吳氏二賢母云

太史公曰吳氏之系何其危哉當璟瀕亡時荃在母腹男女未可知林氏毅然以存孤爲諾非見義明如曠日能然乎使林氏之足一移吳氏宗祀墜矣此其功非再造其家者乎嘗猶狂瀾東奔欲舉隻手以障之抑難矣予謂林氏具五美焉其不畏強禦一也富而能貧二也炳於幾先而不陷於虎口三也干戈紛紜之中嚮環釧市書厲子以學四也終始一致不爲浮議所惑卒令終於牖下五也夫然故其能以節操顯著者宜哉雖然不爲之先孰爲之後非胡氏挈綱振維於上則林氏熒熒然無依矣是則胡氏者不爲尤賢乎賢哉二母如楚之雙璧光彩交映見者動容如越之雙劍光芒閃爍不可狎玩誠可謂無愧於蘇倫者矣嗚呼女婦且爾則凡受人家國之寄委棄若土梗者果何心哉

閩二婦傳

賴道慈閩古田縣人歸同縣張文孫生一清十五歲而文孫歿於疫道慈甫年二十九黃華亂家又毀於

兵羞服且弗完。能確然守志弗渝。人力撼之。泣曰。張氏自浮光遷閩。其不絕如綫者。唯此一子耳。余奈何去之。及一清成人。爲取婦廖氏。生三子。頤。興。埜。而廖亡。繼以陳道真。道真亦古田右族。旣歸一清。粥簪珥治財。與道慈再植張門。一清事道慈。孝極旨甘。道真相之。唯恐有不足。而遇廖之子。不翅已出。道慈晚嬰未疾。手足不能用。道真與媵人余乙。恒挾持以就虎子。道慈體肥重。疲力從事。逾十春秋。弗厭人難之道。真生以寧。年十餘。日授書十三帙。帙三紙。道真夜宿。火至四鼓。自起爇燈。呼兒誦書。坐其傍以俟。頃刻皆能暗記。黎明命之出。送至齋門乃還。以寧愛書或忘食。道真執匕餵之。任其恣觀不輟。二十七以春秋擢秦定丁卯進士第。繇國子助教入選。而爲翰林侍講學士。秩二品。累贈道慈。道真皆清河郡夫人。一清贈福建江西等處行中書省參知政事。文孫贈禮部尙書。閩人榮焉。謂道慈之節。道真之孝。皆卓絕不可及。殆天報之也。道慈卒時年八十。而道真則七十云。傳有之。婦道盡而天倫正。有若二婦。其所謂盡於婦道者耶。

鄭節婦黃氏傳

黃爲浦江著姓。自隋唐以來。卽有聞。而宋隆興癸未。進士度。亦其族也。其居辛山者曰德清。有女曰琇。字守貞。生賦淑姿。不失故家遺範。父母愛之。爲其選良配。元至正己丑冬十二月。歸同縣鄭氏瀛。字仲容。守貞年甫二十。奉上接下。無愆禮。人稱其賢。明年。仲容患疽。流血注肌。覈間一潰。一興。纍纍如連珠。百藥弗驗。守貞扶掖臥起。附膏於紙。而更敷之。雖甚久。無懈怠意。又六年。仲容歿。守貞自矢不再適。且曰。生爲義

家婦。死爲義家鬼。敢失節以玷旌門乎。其志堅凝。屢有撼之者。不少動。寒燈孤幌。澹然能自安。遂命仲容從子柎爲其後。守貞今四十九矣。及見柎授室。生二子。燦。焜。朝夕受其孝養云。昔者孔子稱宓不齊之善。而歸於魯國之多賢。蓋觀感而興。非有資於賢者。要亦非易以成名也。今鄭氏之家。十葉聚食。至大辛亥。嘗旌爲義門。其規度整肅。如嚴霜烈日。可畏而可仰。其德義之涵濡。又如春風和氣之薰蒸。不自知其入人之深。故其化行教洽。過其門者。猶率德勵行。而乖戾之慮消。況爲其家之婦者乎。宜守貞執節之堅。而循禮之謹也。傳曰。一家仁。一國興仁。其理誠不誣哉。予官儀曹時。郡國多以節婦事行來上。輒聞報下。褒異其門閭。觀風使者或以守貞爲言。其有不彰明之者乎。異日烏頭雙表之樹。與旌門後先輝映。不亦一家之盛美哉。予故輯其事。爲傳文一通。衣冠之士。儻有扶植彝倫爲任者。尙見諸賦咏。以同其傳云。

柳氏二節婦傳

柳氏二節婦者。上虞柳宗遠妻唐。及其子桂之婦陳也。初唐年二十三歸宗遠。事其姑孝。越二年。生一子桂。而宗遠卒。或少唐恐其難寡居也。以語試之。唐忿曰。吾喪夫命也。婦不二醮。義也。命天使然。義出於人心。吾縱不畏天。能昧吾心而負義乎。且吾姑老。吾子少。吾去之。將安求乎。益苦心瘁力。營粟帛以養姑。命桂學詩書於鄉先生。姑年八十餘。乃終。而桂長。遂娶陳女爲婦。陳歸桂。逾年。桂亦卒。陳年甫二十四。或閔陳無子。且少也。勸其再配。陳哭曰。此豈人所言乎。吾姑不負吾舅。吾敢負吾夫乎。吾寧卽死。柳氏牖下。不願聞此語也。乃去膏沐。屏華靡。與其姑相依以居。姑食然後食。姑寢然後寢。家內外事。必告而後行。姑婦

孝愛如母子。歲時具殺醪祭柳氏亡人。二婦煢然拜階下。輒涕泣不能相視。後以某子某爲桂。後今唐年六十。陳亦四十。鄉人咸稱爲二節婦云。

史官曰。夫婦者相扶以生者也。相扶以生者。人道之常也。不幸遇夭折。臨禍患。夫不獲婦。婦不得夫。其夫是豈人情所願也哉。斯變故也。夫人處平居無事。雖至閭劣。皆可以勉。事有出於難處者。雖奇偉丈夫。時時猶有失焉。況婦人哉。若柳氏姑婦。皆在少年喪夫。處人之所難堪。以至於老。余讀其事。未嘗不爲之歎息也。人常患後世俗不逮古。是烏可槩言乎。二婦之所爲。擬之古賢婦。何讓乎。余因門人朱瑾請爲列其事。使繼此執筆者有取焉。

王節婦湯氏傳

婦以節名。非常也。變而不失其正。不亦善之善者乎。若王節婦者是已。節婦名慕貞。姓湯氏。世居武林。施水坊。父榮。母戚氏。慕貞生十七年。同里王君暹聞有容德。俾其子常。奠鴈納爲室。既歸。三族媪御交譽之。常字彥常。少有遠遊志。既生女及男驥。元至正乙未。出商番禺。已而之桂林。後六年死焉。慕貞三十有七矣。遙望南海。淚眼無乾時。上承舅姑。米薪鹽醢之費。靡不經度。不足使蒼頭貿易以給。舅姑忘其子之亡。舅嘗患疽。慕貞稽顙北辰。乞以身代。疾乃瘳。舅有女兄二人。年耄無所依。慕貞迎還於家中。養同其姑。夫之季弟曰暉。娶史氏。育二女。貧不能嫁。慕貞擇良壻。治嫁具。遣之。暉與史旅死三衢。慕貞不憚千里之遠。取二喪藏諸先塋。其訓驥尤切。俾事賢傳。受春秋三傳之學。國朝洪武癸丑。取浙江行省第六名文解。

貢入成均。選授吳王府伴讀。朝夕陳訓於王。久之。拜監察御史。近以使事入閩。過其家。方嶽大臣泊都使。者交謁於門。問母夫人無恙。人爲慕貞榮。慕貞不自樂也。且曰。我未亡人爾。自意危如朝露。不復有今日。幸視驥加長。歲時持一觴酒。酌王家墳上。庶他日九泉見彥常。無慚色。爵祿之有無。皆天也。奚暇計哉。君子愈賢之。嗚呼。婦之青年喪夫。最號多艱。儻居貴富家。有儻足。以備驅役。闔廬足以蔽雨風。粟帛足以供衣食。猶可自安。苟或榮。榮弔影。室如懸罄。忍寒夜織機聲。與候蟲齊鳴。達曙不休。自非鐵心石腸。未必不爲之動也。學士大夫讀四庫之書。平日抗手論天下事。何處更有豪傑。一遇絲髮利害。反眼若不相識。視女婦未嘗知書者。乃有所不及。可勝歎哉。濂於慕貞之事。不得不爲之紀載也。夫移風俗。美教化之道。慕貞實有焉。因具書之。以厲爲人婦者。贊曰。

周節婦傳

節婦姓趙氏。名淑。宋燕懿王之裔。安定郡王令諤九世孫也。令諤從高宗渡江南。居越諸暨。遂爲諸暨人。父孟德。有文學。生二女。節婦長且賢。尤愛之。授論語孝經。列女傳。皆能通其義。年十八。求宜壻者。得同邑周本。恭歸焉。始歸而姑卒。旣而舅及兄公奴氏亦相繼死。兄公子顯宗尙幼。節婦相夫。飭喪治葬。咸盡禮。育顯宗如子。歸十一年。生三男。宗善。宗祚。宗政。宗政始生時。天下亂。夫嬰疾甚。恐不起。顧節婦曰。今兵革四興。嗣子單弱如此。我死。爾能自保乎。節婦齧指流血。泣曰。天在斯。吾有不能保孤兒者。天實誅之。夫卒。

節婦年二十九。髮跌號泣。泣間含食哺諸兒。不暫出戶限。明年國朝克諸暨。與僞吳分邑拒戰。兩兵交焚掠。家貲無纖毫存。節婦抱兒及顯宗從一媵出走。匿。惟持田籍以行。深山窮谷間。飢餓顛踣。削木膚采藜糞以食。或聞其艱。勸之曰。呱呱者何足恃。奚爲自苦耶。節婦怒不與言。剪髮示之。益自裁戢。厲色峻辭。使人莫敢近。兵定而歸。富民侵主其田殆盡。節婦持田籍與辨。卒賴以完。知州田若賦高其行。欲上其事於朝。節婦曰。宜然耳。何足上聞。力辭不願。乃復其家。節婦感泣。日治麻縷爲布帛。以繼乏絕。市詩書教諸子。夜焚松脂於室。坐諸子兩旁。而口授之。或怠睡。首俯。輒笞咄不少恕。諸子皆凜然。畏懼如嚴君。視其色變。卽惴恐。莫敢舉目視。及長。遣從名師遊。所友善士。相過則喜。爲之置酒。否則憤歎。竟日。節婦以兄公早歿。惟顯宗存。爲之昏娶。先於己子。羞服與諸子同人。不知辨。諸子遜弟皆有士行。宗祚入爲太學生。以文行稱。人咸謂節婦善教所致云。

謝節婦傳

史官目世之傳節婦者。多貴殺身爲難能。至於守義不二者。則略而遺之。余甚惑焉。鋒刃之威迫於後。湯火在前。有所不顧。此人情所能勉。至於困窮災變。切身凍餒。顛踣而不渝其志。存人之孤。非篤於禮義者。其孰能之。若周節婦是矣。嗚呼。此豈特賢於女婦而已哉。

節義。人性之所有也。豈以所居而變哉。南雄在嶺之南山。毒海悍風氣。與中州殊。論者或從而訾其習俗。其言陋矣。若謝節婦者。安可輕耶。節婦謝氏女。南雄人。年二十八。適郡士鄒永泰。居四年。生子忠。甫十月。

永泰得疾危懼或死有父母存且子幼莫爲計以語覘婦曰吾且夕死然吾家貧安敢以老親幼子累爾哉婦流涕曰君豈病而狂易耶君萬一不幸養老撫孤妾職也妾一移足忍見鄒氏兒爲人奴隸乎已而永泰卒寢愈甚餽盃無朝夕婦節躬力蠶織爲布帛易粟以奉舅姑忠八歲使就鄉師學節縮服食以資束修禮其舅姑不知其貧及舅姑卒鬻所居廬以易槥槨行喪治葬務合儀則或閔其艱勸其再事富人節婦曰我豈不知富人勝於鄒氏乎然鄒氏我所安也使我食他人八珍九鼎不若飲鄒氏杯水耳益自操守不少變教其子爲儒節婦少嘗讀孝經小學書通達義理故能盡婦道云

史官曰嗜慾之性人孰能免哉能以禮義制之則不入於邪僻矣婦之事夫當無恙時指天地神明誓生死不相違棄及遇變故能如其言者蓋鮮矣豈非不達禮義使然耶若謝婦者夫死困厄幾不能爲生而處之欣欣然行其自誓之語如合符契非禮義淪於心能致是耶嗚呼禮義足以治人也久矣

韓節婦傳

節婦韓氏名惟秀開封人元四川行省左丞渙之女也年二十一歸耶律文正王四代孫養正養正時爲劉莊場鹽司令甫六閱月沒於官節婦行三年喪乃還父母家適其弟敏以疾卒二子肅寬俱幼節婦與敏妻賈氏約曰吾聞古之烈女不更二夫吾與汝皆簪纓家子宜則效之苟或失思慮再醮於人縱死爲鬼亦當有餘羞耳賈氏悅曰此妾之志也朝夕乎父母舅姑之側旨若甘恐或不備也衣與衾恐或不完也教肅與寬又恐不知其方也左之右之同心弗少懈歲壬辰賈氏亡節婦哭之慟曰爾何遽去予而死

乎。予寧與爾俱亡乎。不火食者三日。已而又曰。吾苟死。其奈父母何。遂割情忍泣。奉尊撫卑。如賈氏存時。見寬以才學被選。列官國朝。再轉爲侍儀使。節婦今年五十九。其母則八十五云。

史官曰。易有之。不節若。則嗟若。無咎。又曰。安節亨。蓋不改其節。則必能亨。違節之道。則哀嗟自己所致。無所怨咎矣。聖人作易。當無物不該。推此以喻節婦。庶幾亦有合者乎。節婦自耶律君沒。制行如白璧者三十有八年。使令名昭晰於無窮。視彼夫骨未寒。輒棄之他適。爲人唾去。而弗齒者。果孰爲亨而孰爲不亨乎。況節婦無子可依。毅然堅其苦志於母家。此尤卓異可書者。故備列之。然賈氏能與節婦同志。卒以節終。亦賢婦也哉。

趙節婦傳略

監修國史長史張君子長。著趙節婦傳。累辭至九百餘。節婦之孫嗣鴻。懼讀者莫得其要。請濂刪其辭。爲傳略云。節婦徐氏。名定瑞。婺蘭溪人。年及笄。歸金華趙時堯。時堯父盱夫。亦娶徐節婦姑也。無子。生二女。時堯以再從子爲其後。二女以非己同出。不相寧。節婦相夫。順受之。母子以和。時堯卒。節婦年甫三十。誓不再適。養其姑終身。撫弱子。至於成人。復三十年。乃終。若節婦者。其無愧婦道者邪。

王貞婦傳

王貞婦。名妙清。會稽人。年及笄。歸同里可先樓君。生二子。叔仁。澄。叔仁始七歲。澄僅四月。而樓君亡。貞婦毅然以節自誓。朝齋暮鹽。或不能給。而貞婦安之。從事殘燈敗杼。夜參半。猶隱隱聞伊軋聲。人數有撼之。

者志如鐵石而弗可動。舅姑亦憐其少。欲俾更適人。貞婦泣曰。妾聞婦人於夫。一與之醮。終身不移。妾何敢忘家。縱貧得服勞於舅姑之側。他日九泉之下。當有以見吾夫。儻舍之而去。雖終日飲釀。豈肥犬彘亦不食其餘。矧人乎哉。妾有死而已。不能從也。舅姑見其語剛。而意不回。復義之。貞婦自是事舅姑益致其恭。教二子從良師遊。皆成人。知問學。亦頗能盡孝。見稱於士君子間。貞婦去死時年二十七。而今已五十四矣。

史官曰。嗚呼。若貞婦者。豈不爲難哉。自陰教久不行。女婦不知書詩謨訓。其所欲爲。鮮克由於禮者矣。而貞婦乃能矯然自異。如勁松挺挺於蒿萊間。是何可及也。嗚呼。若貞婦哉。豈不爲難哉。

王貞婦傳

貞婦名順榮。字靜安。姓王氏。台之黃巖金沙里人。性莊毅。日處深閨。人不見其面。其父廣東元帥嗣奇之。慎擇所配。年十七。歸同邑楊伯瑞。伯瑞以才用世。累官行樞密院斷事。官階從四品。得封貞婦河南郡君。至正間。苗獠兵侵天台。伯瑞帥師往扼之。弗勝。遂遇害。貞婦時寓四明年二十又七。生子慶壽。始兩月。聞夫亡。躑躅欲求死。親屬交相慰解。遂護喪還葬於鄉。屏鉛華弗御。戴道家冠。被鶴氅衣。儵然如塵外人。未嘗輕於笑語。人謂之。則曰。我未亡人爾。尙何心。迨逐世好耶。鄉里小兒欲媚上官。以貞婦美姿容。嗾使聘之。不從。將以威劫其去。貞婦遽引刀斷髮。痛冒不少休。事遂寢。越三年。有權貴人聞其賢。強委禽焉。貞婦度不免。拊膺長號呼曰。楊樞密何在。楊樞密何在。妾將相從於泉下。因悶絕仆地。媵人抉齒。以藥灌之。移

時乃蘇。俟間執慶壽手曰：吾命婦也，不敢虧節以辱汝父。汝父亡，我非不能死，以汝年幼，將誰育之？卽不育，歲時何人持卮酒以酹汝父墳？乃忍死至今。今汝已十齡，吾復何憂？我將死於汝父之墓，言訖泣而行。慶壽號訴從母林氏，林亟往救。貞婦以刀自剄，不殊。林奪刀挽之歸，環守至旦，稍解。貞婦復斷髮如初。權貴人曰：此烈婦，不可強之，強之不祥。嗚呼！女婦之質甚弱耳，扣盜足以駭走之，今貞婦乃不爲威武所屈。若是，非其秉志剛，見義明，有不能也。世以丈夫自居者，冠帶儼如步趨，鏘如議論，藹如人，倘以女婦目之，則頽然怒去，及究其所爲，一遇小利害，則甘心喪其所守，似婦人女子之不若。抑又何說哉！然自兵亂以來，婦人徇節而不屈者，或自剄死，或墜崖下死，或赴水火而死，固人之所難。此特出一時義烈所激爾。有如貞婦處孤燈敗帷間，淒風蕭蕭然中人，歲積月深，必有甚不能堪者。恒人之情，寧不爲之少衰。貞婦之操，則愈堅如鑛石，百折不撓，豈不尤人所難者乎？使一鄉之得若人，必有率德而勵行者。由是達之一邑一州，無不皆然。其於移風俗美教化之道，有國家者，蓋有賴焉。是宜爲之傳，以俟觀民風者。贊曰：昔夏侯令女夫死不嫁，遂致斷髮爲信，或蹙迫之急，乃割耳與鼻，誓不欲類於人。至今想其遺風，猶凜凜然可畏也。今貞婦截髮絕人，其厲操蓋與令女同。若其持刀自刎，比之割耳鼻者，且欲并身而捐之，其志爲益苦矣。嗚呼！令女不可見，有若貞婦，其所謂異世而同符者非耶？

徐貞婦鄭氏傳

徐貞婦鄭氏，名妙靜，衢之西安人。其父頤，本簪纓家，娶周，無他男子，惟產四女，而貞婦居其三。年十齡，相通

孝經大義。沈毅如成人。諸女或與之狎。輒厲聲叱之。皆畏讐不敢近。父奇之。慎擇所歸。聞同郡徐思誠。乃宋忠莊公徽言之七世孫。代有顯人。而思誠又習進士業。燁燁而文。於是慨然許之。及合卺成禮。貞婦已十九矣。時舅天祥與姑朱氏春秋皆高。貞婦靡日靡夜事紡磚。惟謹。由是羞服備給。上獲舅姑心。凡遇賓祭。亦悉意助集。不足則質簪珥供事。及其自奉。疏食水飲。甘之若飴。舅歿。貞婦出所畜布泉。爲含襚。衰經諸費。始得成喪。思誠出卜藏地。舟覆溺死。上航溪。貞婦哭慟。幾欲無生。不憚勞動。葬舅與夫先塋之側。養姑高堂。日間起居。察時燠寒。爲衣進之。退撫二子謙貞。俾從醇儒學。而與勝己者交。非其類者絕之。雖寒燈涼幌。人不能堪。貞婦處之裕如。父母及諸娣憫其年少。欲使其更醮。貞婦曰。吾夫固亡。有二子在。斯不謂之亡矣。脫若無子。其如姑老何。義亦不忍去也。具人之形。而犬彘其行。妾肯爲之乎。卽引交股刀。截去髻。誓不二夫。聞之者懼不敢撼。貞婦見二子成立。謙以行義。察舉爲部使者掾。以政事聞。擢爲瀧水丞。貞婦喜曰。吾今而後可以見吾夫地下矣。謙當之官。會恩例。覃及於親。受文綺細繒之賜。貞婦益喜。召謙至。出白金盤八。授之曰。國家寵恩至矣。爾居官宜冰蘖自守。祿或不給。則售此用之。慎毋瀆貨爲也。洪武二年。知縣何忠以貞婦年三十夫亡。寡居二十八年。冰清玉潔。可以厲民風。乃上其事於府。知府王珍加覆覈焉。浙江按察僉事張思立復廉其非誣。然後具牒上行中書。以次達之中朝。三年四月。得旌表其門如令。貞婦今踰六十。又四。康強無他疾。嘗有田宅爲強族所據。屢訟不得直。夫歿。讓弗與競。及宅轉鬻他姓。貞婦贖居之。識者謂貞婦知大體云。

史官曰。禮始夫婦者何。蓋有夫婦而後有父子。有父子而後有君臣。三者雖殊。其道一而已矣。若使婦不二其夫。子不辱其親。臣能忠於君。天下其有弗長治者乎。奈何世教淪胥。士大夫誦法先王。往往或至於悖君父。有如一女婦之微。不甚知書。乃能抗節自守。足以增於五倫之重。亦可慨也夫。故予於徐氏之事。特爲著傳文一通。不少讓。將以厲子職。樹臣節。重名教。非曰徒作也。有來讀者。毛髮將聳然而立矣。

蔣貞婦傳

蔣貞婦。德新世居歙之黃山。自幼莊靜。父忠甫。爲之擇配。鮮有當意者。年二十有八。始歸同郡羅宣明。宣明鄂州刺史諸孫。家法素謹。貞婦奉尊章。處先後。咸底禮度。中外稱之。弗置。至正壬辰。斬黃妖寇起。破州郡。屠戮人如刈草菅。蔓延將至歙。宣明散家貲。募兵保障鄉井。已而兵大集。歙城陷。官軍復者再三。宣明功爲多。癸巳夏四月。元帥沙不丁治歙城。以宣明慷慨仗義。俾分築一百三十尺。宣明之家。索於用兵。其計無所從。貞婦盡售奩中物相之。宣明忘其憂。乙未冬十二月。郝門黠縣惡少年。搆浮梁劇盜來犯歙。宣明謂貞婦曰。我素負殺賊名。賊必不貸我。汝宜相從軍中。如何。貞婦曰。婦人在軍中。兵氣恐不揚。子獨不聞之乎。妾有兄弟在香山。柴柵頗可守。妾往依之。君努力自愛。勿以妾爲念也。遂灑泣而別。丙申春正月。歙城復陷。宣明請兵江浙行中書。賊聞宣明妻孥在香山。攻之益力。二月天雨雪。寨破。賊大肆焚掠。初貞婦以宣明從征。不忍茹酒肉。至是炮炙行觴。命左右醉飽。以二子驢兒。馬兒屬蒼頭奴詹寄。詹勝寶曰。事勢至此。我誓不受辱。一死決矣。然不可使羅氏無後。汝宜護二兒還主翁也。言訖。勝寶負驢兒出。媵人挾

馬兒繼之。貞婦又繼之。遇賊石崖上。賊遂褫其衣。貞婦力拒賊。攫貞婦髮。貞婦齧其臂。爪其面。出血罵曰。死狗類。汝何不殺我。賊怒。斫其臂。以刀舂之。墜崖而死。驢兒見母死。哭罵曰。賊賊爭忍殺吾母。他寇曰。何等小物。敢爾耶。橫槊刺其背死。勝寶遁。寄不勝怒。執木戟。擊傷數寇。與媵人皆遇害。日將夕。寇退。貞婦從姪蔣志道。從積屍守緣崖下。見貞婦屍如生。傍有衣篋。類有物。窸窣然動。啓視之。馬兒在焉。亟抱以歸。宣明云。

太史公曰。喪亂之餘。女婦以節著者有矣。若歛之蔣氏。何其烈哉。夫以柔脆之身。竟欲抗如虎之盜。自非義激於中。視死如歸。其氣不如是之烈也。大抵故家遺俗。詩書之澤。弗替。宣明又能奮揚而飭導之。使一門之內。婦死於夫。子死於母。而一蒼頭之微。亦能爲其主捐軀。此殆難以聲音笑貌爲也。然則宣明亦賢矣哉。賢者宜有後。篋中之兒。所以能獲全於今也。

王媛貞阮傳

王媛貞阮者。名淑。臺城人。均州守阮容之子。歷陽王瑀之妻也。瑀故名閥。淑亦出右族。好禮而貞。一陽和陰肅。懿聞流三族間。瑀以材起家。爲裨將。當戍夫槩。夫槩與敵土犬牙。瑀將邏騎偵其營。敵意勁兵壓境。悉力迎戰。瑀知不能免。蹈白刃前。邏騎皆逝。瑀尋被執。以不屈死。淑慟曰。夫者。婦天也。吾天傾矣。尙何所仰哉。遂蒙被泣臥。不粒食。媵人以食進。淑麾曰。去。吾不食矣。已而氣阂。若絲。先後僅屬。媵人又以藥進。淑復麾曰。去。吾不藥矣。如此者七日。竟終。年甫二十三爾。淑葬金華城北黃塢。其顛有異瓜。生蔓一而四。

實其色光翠如沐者。君子謂淑能知貞道矣。貞道明則常倫定矣。詩云。髮彼兩髦。實維我儀。之死矢靡他。此之謂也。頌曰。

翼翼貞阮。執行有常。夫戍而俘。盡然隱傷。不食以死。其節煒煌。瓜瓞之生。天旌厥祥。

宋烈婦傳

烈婦宋藝^音字新。金華潛溪人。美姿容。幼卽讀書。知大義。搦管作字。亦莊正可觀。既長。歸烏傷賈明善。足不妄踰戶闕。雖家人弗聞其語笑聲。一宗謹曰。是端簡靜默也。賈氏有婦矣。父母亦賢之。不忍其遠去。左右越一年。令與夫來居潛溪。烈婦孝養益謹。見諸女讀古烈女事。則慨然想其爲人。既而曰。是亦不難。爲婦者。當壁碎而潔。無令瓦全而穢也。歲戊戌十月。西兵擣蘭溪。遠近大震。烈婦不自安。同夫避入浦陽城。寶山中未幾。鄉民嘯聚倡亂。樹旌纛。執劍殺人。如刈草菅。烈婦亡匿灌莽中。爲遊卒所執。乃抽銀條脫求解。不聽。將亂之。烈婦以計紿曰。吾有珠貝。可直數千緡。昨夕瘞山前坎中。爾幸無急我。急我我將死。於爾何利。不若導爾發之。遊卒悅其言。從之。行至深淵側。竟躍入死焉。時十一月十四日也。其兄濂聞而哭曰。天乎。烈婦在家爲淑女。歸人爲良婦。既淑且良。縱不備有五福。豈其不得考終於寢乎。不知何爲而遭茲兵禍也。嗚呼。自古莫不有死。當是時。執法之大吏。秉鉞之將帥。守土之二千石。或有不能。而烈婦獨能捐軀殉義。死固死矣。千載猶生。視彼弗死而若死者。何如也。縱避兵禍。又何傷焉。然而婦之守貞。猶人子之嘗孝。人臣之嘗忠也。烈婦之死。恒道爾。何足深羨乎。雖然。是固恒道爾。而亦非易致也。人之所欲。莫甚乎。

生苟所見一髮未盡。則幸存之念興。幸存之念興。含辱忍垢。何所不至哉。想其臨淵之時。貞剛之氣。充塞上下。天不足爲高地。不足爲厚。日月不足爲明。視區區微生。直鴻毛輕耳。不然而以能若是之烈也。徵太平日所言。當壁碎而潔。毋令瓦全而穢者。不亦允蹈也哉。烈婦之事。與軋之寶氏。越之王氏。無大相遠。求之千百。而不一二見焉。濂因不避親。撫其行實。著爲私傳一通。所以白烈婦之志。他日傳之竹帛。詔諸海內。良史氏職也。非濂之所計也。

謝烈婦傳

謝烈婦。芾。婺之金華人。年十三。適蘭溪吳履。奉尊章處宗族。以禮性勤而剛。事非義。毅然執弗行。鞠撫衆。鷄。紉箴補綴。常至夜分。雖血貫指不自寧。履貧而宦遊。家政一聽芾。能弗墜。戊戌春三月。西師破睦州。遊騎日壓境上。芾懼。急謂履曰。妾聞西師鐵騎逾十萬數。出則塵埃蔽天。白日爲黃。旣得睦。必東窺婺。謂其不至者妄也。卿讀書。號男子。宜察知之。妾衰瘦如鬼。旦暮禍及。決不能挈弱幼遠遁。曷若先買舟東下。爲上計。否則歸妾母家。母家南有池。卽有急。以身餒魚鼈爾。誓不受污。以病君也。履重於行。紿曰。勿恐。有履在也。冬十月二日丁卯。履出城南。芾復申前言。且促履曰。宜急旋。稍緩。噬臍無及矣。履復答如初。越四日辛未。芾見潰軍被血衣。東奔不絕。謂媵人曰。事急矣。候雞再號。裹糧挾季女以東。媵人負小兒從。明日壬申。力憊甚。芾猶手牽女。且行且泣曰。汝父不得復見矣。吾與汝死卽死耳。身不可失也。遂避入金華山中。媵人後視芾不相及。棄小兒道上。亦泣去。已而遊兵四出。赤幟徧山澤東西。作呼嘯聲。略女婦無算。芾度

不可免。力疾捫蘿而上。抱女投崖下死。履歸求之。浹日始得尸。母與女相向。其貌如生時。嗚呼。人極之所由建者。三綱也。使臣子之於君父。皆如芾之弗畔其夫。國家安有喪亂之禍。哀哉。嗚呼。世之號士君子者。平居暇日。高自稱譽。無不曰我學周公仲尼之道。苟指爲婦人女子。則勃然怒去。一旦君父有難。輒或竄或伏。不翅狐兔。是婦人女子之弗如。抑又何說也。然自兵興以來。女婦以節著者。亦頗見之。未有若芾之烈者也。夫豈樂死惡生者哉。誠以義塞於內。與其生而抱愧。寧若死而就安。推其所志。神明可通。金石可貫。衡嶽之層雲可開。非細故也。葬倫風教。於是所係爲甚重。濂故爲文道其事。使世言行人。心或不亡者。當自省矣。嗚呼。彼有家而奉箕箒者。孰非人婦。孰非人婦哉。贊曰。

戊戌之變。濂女弟。髮亦以乘節沈淵死。後烈婦特三十有六日爾。濂悲之。淚落弗止。聞有如髮者。必謹叩之。或歷其地以訪焉。間嘗過金華山中。問烈婦投崖處。悲風四集。林木怒立。猶凜凜有生氣。豈其貞魂烈魄。猶足以感人耶。烈婦雖死。其弗死矣夫。

張義婦傳

義婦張氏。濟南鄒平人。年十八。歸戊卒李午。午同從子零出戍七閩。未幾午死。張獨事舅姑父母。生養死葬。無遺禮。復痛夫死數千里外。枯骨未知所歸。乃往臥冰上。呼天祝曰。天乎。妾夫何罪。妾夫何罪。生既不見父母死。又不能歸葬父母之傍。使無妾卽已。妾在敢愛死乎。天若許妾取夫骨。雖寒甚。當得不死。踰月竟不死。鄉人異之。爲聞於縣。給過所遺之。至閩。零猶在。問夫葬地。則榛莽日塞。不可識。張哀慟幾絕。夫忽

降於童。與張語生前事甚悲。且示骨在處。張如其言。發得之。持骨祝曰。爾信妾夫耶。入口當融如冰雪。黏如膠。已而果然。官義之。爲上於大府。請復其家。使嘗護喪歸濟南。

金華宋濂曰。濂聞長老言。廬陵有趙應祥者。父行賈。死利津。亂葬叢塚間。應祥求之。慟哭七日夜。不得。乃解髮繫馬鞍上。祝曰。天若有知。行至父墓。鞍卽墮。未幾鞍墮。發而視之。果父也。葬時所題名氏猶存。此與義婦之事頗類。傳曰。孝悌之至。通於神明。此之謂夫。

貞婦郭丑小傳

郭氏丑。字道安。六合人也。美姿容。其父彬。授之詩書。輒通大旨。母劉氏。得末疾。諸弟妹尙幼。羞服無所倚。賴道安上扶掖。母氏起居。下撫孩穉。漱澣紉綴之事。皆親之。冬盛寒。燈火蕭然。持箴恒至夜半不休。且不樂靡麗。身衣紈素。同綺繡女偕坐。略不動容。目亦不注視。至於纂組烹飪。不經師授。而悉精其能。彬絕愛之。不肯歸。凡子同里。鄭元來求婚。彬激曰。爾能從師攻文辭。卽可爾。元乃力學。道安年十九。竟妻元。婦道甚修。譽起一鄉間。元以古列女傳難之。道安曰。某女事如此。某女事如彼。一一舉之。無漏文。元不能屈。因加進學功。其父讓不悅。痛繩之。元悒悒不樂。道安曰。子但盡誠盡孝。他非所知也。瞽瞍底豫之言。豈猶不聞之耶。元釋然。道安秉性堅貞。彊暴欲侵凌。道安厲色叱之去。其人恃爲尊屬。屢見迫。道安彈指出血曰。父誤我矣。父誤我矣。不幸遇此。唯有一死爾。媵人勸曰。何不告夫君知之。道安曰。吾苟白其故。父子何面目相見耶。曰。此人倫之變。宜走訴父母。使其知所忌。不敢肆。道安曰。祇揚惡聲耳。無益也。不若就死之爲。

安日向中道安潛出沈於河時洪武十年七月十七日也彬聞之悲欲無生瘞於楊子西沙清水潭上一夕元夢其來車馬儀衛甚都且曰妾今在長蘆水府掌鉤考人間善惡念子索居故一來耳不可久留也言畢颯然如兩風而去次夕其姑夢亦如之長蘆在城南二十五里云

史濂曰郭氏素稱詩禮之家婦人女子亦有異於人彬之姊真適許士瞻生一女而士瞻死年始二十三耳今垂五十而節操凜然而道安又貞烈如此誠可爲敬仰哉傳言忠節之人歿必爲神明長蘆之事雖近誣亦不敢謂決無是理也嗚呼新臺之什孔子刪詩而不削去者其垂訓也遠矣哉

宋學士全集卷之十二

題識

恭題御製文集後

臣聞有德者必有言。蓋有德者和順積中。英華發外。無非天然之文。不待勉強而後成。譬猶大化流行。融液通暢。而萬物發舒。各得生生之妙。精神充衍。無往不在。故大舜作五絃之歌。湯爲盤銘。武王造起居之誠。皆燦然成文。此揚子雲所謂聖人之言。炳若丹青也。恭惟皇常陛下。統御以來。用人文化。成天下。睿訓諄復。惟恐一夫不獲其所。天縱聖能。形諸篇翰。奎壁照耀。層霄絢采。光被上下。萬象動色。然而建中於民。寤寐弗忘。則有虞阜財解慍之歌也。夙夜修省。常如神明。森列左右。則湯武盤孟几杖之銘也。仁民愛物之心。隨感而見。布於方策。溫潤淵深。統貫乎斯道。光芒氣燄。蓋覆乎六合。前聖後聖。實異代而同符也。臣供奉詞林。幸日侍几硯。仰瞻揮灑之際。思若淵泉。頃刻之間。烟雲盈紙。有長江大河一瀉萬里之勢。跪捧而觀。殷彝周鼎。未足喻其古也。泰山喬嶽。未足喻其高也。風霆流行。未足喻其變化也。蓋由天德粹純。無聲色之好。無遊畋耽樂之從。聚精會神。凝思至道。形於心聲。同功造化。非語言形容之可盡也。且當萬幾之暇。時御翰墨。多不留稿。見於侍臣之所錄者。得若干篇。臣竊以爲日星昭回於天下。而萬物蒼生。無不仰照。聖皇之文。猶日星也。是宜刻於文梓。流布四海。使見之者。咸獲咏嘆文明之化。熙熙皞皞。相與率德。

勵行以爲忠孝之歸。豈不盛哉。於是敬錄如上。文與詩凡五卷。續有制作。復編類爲後集云。翰林侍講學士中順大夫知制誥同修國史兼太子贊善大夫臣宋濂拜手稽首謹書。

恭題御製論語解二章後

右解論語二章。乃皇上所親製。以賜翰林修撰臣孔克表者也。初上留心經籍。以爲經之不明。傳註害之。傳註之害。在乎辭繁而旨深。洪武六年。乃詔克表及御史中丞臣劉基。秦府紀善臣林溫。取諸經要言。析爲若干類。以恆言釋之。使人皆得通其說。而盡聖賢之旨意。又慮一二儒臣未達注釋之凡。乃手釋二章。以賜克表。俾取則而爲之。克表等承詔釋四書五經。以上詔賜名曰羣經類要。復裝褫所賜爲卷。以臣濂嘗與聞斯事。請識其左方。臣聞聖人之治天下。養之以政。而教之以道。民非養不生。非教不明。三代以降。未有兼之者也。欽惟皇上以聖智之資。治民之政。壹法乎古。復慮經旨晦而人不知道。乃釋諸經以教之。其爲後世慮者。可謂詳且備矣。克表適際盛時。而預執筆。承明詔。豈非幸哉。昔唐之盛時。太宗有志於教化。而孔氏曰。穎達者。實率諸儒爲五經疏。天下至今傳而誦之不廢。今上開物牖民之心。過於太宗。而克表復爲諸儒首。孔氏可謂世不乏人矣。他日是書之傳。將與穎達之疏無異。則夫聖謨之詳。烏可不知所自哉。臣故表而出之。使後世知類要之書。實本諸此也。

恭題御賜書後

昔在乙巳之春。臣濂待罪右史。三月十五日。臥病京師之官舍。不入侍者六日。上顧近臣。黼曰。老宋起居。

何久不見邪。黼以病對。且言其致疾之詳。上憂形於色。曰。宋起居純飭之士。不參以分毫人僞。侍予五年。猶一日也。不知何以而有斯疾乎。越一日。又問曰。病勢稍損否。黼對如初。越二日。又問。黼復對如初。上惻然曰。爾往傳命。俾歸養金華山中。父子祖孫。驩然同聚。疾必易愈。愈且速。造朝。國家文翰。庶有賴哉。二十四日。黼至。導宣上旨。臣力疾起拜命。越翼日。陛辭。上勅黃門內使出。大府金。藉以束帛。賜之。自後候問之。使相屬於道。時方嚴肩輿之禁。自相國以下。至百執事。皆弗之許。特命中書造安車。給健丁六人。以載此。尤異數也。二十八日。皇太子以舊學之故。復遣內臣存問。賚以繒幣白金之屬。恩意有加焉。三十日。上道。夏四月十七日。方抵金華故居。十八日。具謝表一通進上。并致書太子。以寓箴規之意。上覽之再三。喜甚。謂太子曰。此書汝當日誦一遍。復親御翰墨。賜書褒答。其文則上所自製。字乃侍臣代書。其外封九字。內年月六字及花書。則上之親筆也。復出官局文綺白繒各一。命太子署名緘封。遣使者即臣家以賜焉。時六月七日也。惟上深仁如天。厚澤如地。凡囿於兩間者。莫不同浴神化。鼓舞至德。以臣之微。亦獲霽被。寵榮如此之至。竊伏自念。臣本一介書生。應聘而起。卽典儒臺。未幾召入禁中。授太子經。由是峻登記言之職。賜服金紫。先後所承恩數。不一而足。今以微疴之故。又勤宸念。眷注優異。錫予便蕃。此固上天雨露之滋。一草一木。無不使遂其生成之性。而臣區區犬馬之誠。所以思報效之者。何日而敢忘哉。天保之詩曰。天保定爾。亦孔之固。俾爾單厚。何福不除。臣敢誦此詩。以答上賜。復追疏遭逢之盛。於賜書後。示諸子孫。俾世世毋忘上恩云。

恭題御筆後

洪武元年夏四月。上幸北京。五月四日。道經下邳。駐蹕於東門外。設壇具牢醴。祭於山川百神。祭畢。遂升御舟。召守土臣四明李侯相。親出御筆一道。且諭之曰。山東故官聽其從宜居處。以俟選用。相既稽首拜受。因復奏曰。其有願往南京。及旋故鄉者。何以遇之。上曰。卿稽其人數。去南京者。日子米二升。還故鄉者。皆給一斛。相退。奉詔行之。嗚呼。非聖德如天。一視而同仁者。其奚暇念及於此哉。越三月。燕都遂平。懷柔綏徠之效。蓋有不疾而速。不行而至者矣。相既侈茲奇遇。裝潢成軸。持以示濂。濂方待罪國史。謹已備錄。藏諸金匱。復爲記其事於左方云。

恭題御訓談士奇命名字義後

國朝之制。設中書舍人十餘員。開署禁中。專掌繕書誥勅。書畢。赴吏部。主事徧詣中書省。御史臺。大都督府。親簽名氏。然後頒行。湘陰談士奇。時官本部。主司勳之科。洪武十年春三月四日。受事於中書舍人。忽遇上御步輦而至。問曰。爾爲誰。士奇跪對。臣吏部主事也。曰。爾何名。對曰。士奇。曰。其義云何。對曰。臣聞之於師。俊美之謂奇。曰。爾之入仕。儒邪。吏邪。對曰。習刀筆之吏。爾考功監令郭傳在側。奏曰。士奇雖吏。頗誠懇。自持。上因命奉御取筆。以進。書曰。夫吏之爲奇。公以事法以當。如律天下。他所不及。乃曰奇。凡二十二言。士奇頓首再拜。舞蹈而退。士奇既默識之。歸紀於簡冊。復用金書成卷。私竊以謂蟻蝨之臣。姓名上徹天聽。兼之聖謨洋洋。戒勅深至。眞所謂千載一時者矣。乃來請記其事。以著寵恩之所自。臣濂聞之。背私

之謂公。當理之謂法。行法當理。則不謬於是。非處事無私。則允合於公正。苟能是。雖律之天下。人將有所不及。始可謂之奇丈夫矣。至哉聖人之言。何其表裏之兼該。本末之詳明也哉。士奇宜晝夜欽承。以奇自負。精白一心。盡瘁事國。庶幾無愧寵靈之施者矣。士奇尙勗之哉。士奇通法律。歷長沙衡陽二府史。陞湖廣按察司書吏。擢虎賁左衛知事。以轉今官云。洪武十年冬十一月。前具官臣金華宋濂謹題。

恭題御書賜靳春侯卷後

洪武六年夏六月十又三日。皇上幸大本堂。堂乃儒君講道之所。而諸親王肄業於左右。當是時。助舊之子亦聽執經入侍。上既至。召開平忠武王之子鄭國公常茂。靳國武義公之子靳春侯康鐸。列於塔下。慰勉再三。復勅奉御具觚翰親書二帖。一賜茂。一賜鐸。帖皆八字。其賜鐸者云。謹承祖業。愛爾勤功。鐸稽首再拜而受。乃命良工。用黃綾玉軸裝潢成卷。珍襲以示子孫。鐸嘗受經於臣濂。來請識之。臣伏觀國家之遇勳舊。義雖君臣。情踰父子。上下相孚。脗合無間。靳國公值四海雄爭之初。多樹奇功。不幸早世。不得見今混一之盛。宸衷憫悼。朝夕弗忘。既勅近臣經紀家事。復令其子習學禁中。且以承祖業爲勗。其恩數至優渥也。夫祖業未易承。必勳功之人。乃克能之。聖謨所及。正合書中業廣惟勳之義。鐸宜拳拳服膺。而弗失。庶幾上不負君師之訓。下可以保前人之功業矣。鐸尙勗之哉。鐸尙勗之哉。帖旁書康二子者。以別與茂也。二子鐸與其兄鑑。鑑今僉廣西護衛指揮使司事云。九年秋七月二十二日。翰林學士承旨嘉議大夫知制誥兼修國史兼太子贊善大夫臣金華宋濂謹識。

恭題御制賜給事中林廷綱等勅符後

洪武十二年正月二十一日。上御奉天門。權給事中林廷綱等六人。以歸省其親爲請。上欣然可之。明日。陛辭。上親制勅符諭之。且命人各書其副以歸。廷綱等咸叩頭拜受而退。旣而廷綱嚴裝成卷。以示臣濂。請識其左方。臣聞古聖君之待重臣。當授職之際。必告之以言。如堯之命九官。周康王之誥君陳者。有之矣。今廷綱以初試職之小臣。而有此賜。誠古所鮮有也。小臣膺此賜。或有之。然昔時訓命之辭。多作於代言之官。如廷綱之賜。出於上所親製者。無有也。親製者或有之。求其誨諭諄切。期望深厚。猶父命子。如廷綱所被者。無有也。嗚呼。上之待廷綱。可謂至矣。廷綱宜何如報哉。廷綱其去而思乎。昔者處乎閭巷而齒乎恆民。今一旦至此。果誰之賜歟。烏可不盡心也。上之望廷綱者。以忠爲先。而忠非效一職奉一令之所能盡必也。至公而忘私。徇義而忘身。斯可矣。苟徒恃上之寵榮。以夸其鄉邦。是恆人之智爾。於廷綱何取哉。是月二十五日。前某官臣濂拜手謹題。

御賜資治通鑑後題

元順帝卽位之九年。海宇晏寧。文治誕敷。乃開宣文閣。設經筵。詔翰林諸臣分番進講。復出司馬光所編資治通鑑。分賜近臣。集賢大學士浦陽吳公直方。時爲大長秋官。屬實獲與茲寵榮。公旣引年歸江南。慨念上之恩不可忘。命郡諸生宋濂備識之。以示子孫。濂聞先代典籍。遭秦焚滅之後。至漢孝文時。漸采用之。自是厥後。遵用儒術。竊意簡冊流布已久。公卿大夫必咸習之。及觀東平思王傳。王以上之叔父來求。

太史公書大將軍鳳白不許。然後知天下之書尚多藏於祕府。雖以王室近屬。有不得易見之。夫以王室近屬。且若是。則其他疏遠之臣。尤可知矣。嗚呼。太史公書其褒善貶惡之義。多取則於春秋。顧乃靳而不許。是何漢德之不弘也哉。方今朝廷更化。稽古右文。公卿大夫。孰不知讀太史公書。上方以謂歷代之史。有資治道者。莫備於通鑑一書。復出以賜近臣。天光下臨。衣被萬物。聲教所及。罔間朔南。嗚呼。盛哉。濂也不敏。間嘗上謁於公。獲觀此書於存心堂。黃綾爲褱。整飭嚴煥。於是拜手稽首而識其後。非惟昭公遭逢之盛。而使後世珍襲惟謹。至於聖代文治之隆。有非漢世之所可及者。他日太史氏亦當有所采云。至正十五年正月望日。里生宋濂謹記。

題魏受禪表後

右魏受禪表一通。劉禹錫以爲王朗文。梁鵠書。鍾繇鑄字。世號之爲三絕。筆法勁拔。如鑄鐵所成。蓋得蔡中郎之遺意。至唐人效之。則流於斌媚矣。朗字景興。東海郟人也。史稱其文博而富贍。觀此碑。蓋可見云。

題梁元帝畫職貢圖

梁元帝職貢圖一卷。自且末中天竺師子北天竺渴槃陀武興番高昌及建平蠻臨江蠻凡九國。前圖使者形狀。後列其土俗貢獻歲月。而各國咸如之。絹素剝蝕。幾若不可觸。古誠古矣。然猶有可辯者。據梁元帝卽蕭繹。其字世誠。武帝第七子也。梁書稱其任荆日。畫番客入朝圖。名畫記遂因其說。亦云畫職貢圖。并序外國貢事。又據裴孝源公私畫錄所載。梁元帝畫六卷。並有題印。而無職貢圖。又云。職貢圖三卷。江

僧寶畫。乃隋唐官本。上有陳梁年號。後來議者謂裴貞觀中人。官爲中書舍人。距釋時尙未遠。其言當可徵。洛陽任子羔一祖裴說。而駁史氏之妄。踰數百年。則此圖已不能定於何人所作矣。況釋以湘東王鎮江陵。與岳陽王督互相攻戰。曾無寧日。嘗遂降魏。魏遣柱國於謹取江陵。釋焚古今圖書十四萬卷。歎曰。文武之道。今夕盡矣。釋尋遇害。竊計其時。釋亦何暇娛情於繪畫之事。脫誠有之。亦與十四萬卷同歸灰燼矣。惡能至於今日哉。此濂之所未喻也。又據李龍眠手帖云。梁職貢圖。首虜而終蠻。凡三十餘國。而所謂三十餘國。又皆不與史合。自晉氏渡江。南北分統。北虜豈能越海而來貢邪。嗜古之家。又謂此圖唯傅正字欽父所藏者爲真。首河南而終狼牙修。凡二十二國。其國與龍眠所言。又有同異。且似疑龍眠首虜之說。而易虜爲魯。魯乃伯禽之裔。東表元侯之國。四裔之中。亦豈有所謂魯邪。今以此卷較之。傅本又絕不同。均號職貢圖。而乃復參差如此。此又濂之所未喻也。又據此卷題曰。梁元帝畫。每段所寫土俗貢獻之事。則云陶學士書。豈釋畫此時特留餘地。而侯陶之書邪。此又姑置之。陶自跋其後。初書廣順三年云。中間字多糜爛。不可屬讀。後復書云。夏五月二十九日。汴上雨中書。北海陶穀。時具位珥貂三載也。據陶名穀。字秀實。邠之新平郡人。邠。卽豳也。古在雍州之域。漢屬安定北地郡。漢末置新平郡。今易北地爲北海。亦嘗有其說邪。陶起家校書郎。在周爲翰林學士。入宋歷禮刑戶部三尚書。遷承旨。年六十八卒。贈右僕射。陶嘗自言頭骨當珥貂。因人笑之。自悔不復言。況在翰林日。初不珥貂。安肯自書以衒人邪。陶博學善記。以辭翰擅一世。今所書字。形體窘束。絕無俊逸之氣。頗類書經手所爲。觀其書佛作仙。壻作姪。蓋

未能猝變者。此又濂之所未喻也。然其畫意渾璞。而無世俗纖陋之態。固不得爲真梁物。要亦爲宋代名筆所作。世之粗工塗青抹紅以欺人者。見之必循墻而避矣。濂與王君子充同觀青溪上。偶因吻創在告。援筆題之。不覺其辭之多也。

題唐太宗哀冊文後

天台詹君國器。嗜古如嗜利。近於汴梁市中。購得褚登善所撰唐太宗哀冊文一卷。舊嘗藏相臺岳珂倦翁家。後有北燕喬質成所題。定爲唐人書。詹君旣自識其左。復請濂一言之。濂聞唐故事。哀冊國之大典也。非職載筆至司鈞衡者。不敢爲之。登善自貞觀二十二年九月己亥爲中書令。二十三年三月丁卯。太宗不豫。四月己亥。幸翠微宮。五月己巳。崩於含風殿。庚午。奉大行御馬輿還京師。當是時。登善秉政。中書緝熙帝載者。已九月。哀冊必屬之。蓋無疑也。此卷當爲命藁之第二。故於二十三年下。闕歲次。己酉五月甲辰八字。嗣皇帝下不書治字。家傳縉雲下。無高祖配天一人有慶八字。迺悲風於長下。缺術字。然特其缺文爾。徵之大詔令。羅圖。琬琰集。文粹。文苑諸書。其更改又各有同異。殆不能悉數也。濂竊按正史雜史。咸謂太宗以八月庚寅日葬。與大詔令等書並同。庚寅則八月之十八日也。今獨云庚子。則是月之二十八日。不知何以有一旬之差。將史誤耶。或藁本之筆訛也。嗣皇帝之名不書。懼瀆也。其理固當。太宗之崩。旣書二十六日己巳矣。年月甲子。初何足隱諱。而懸空之耶。尤有不可得而曉者。相去七百餘載。其事不可臆度。未可以遽言也。若論字畫。當爲登善所書。登善初師虞世南。晚入右軍之室。故唐之能正書者。僅

二十八人而登善居三四之間。此卷溫潤似虞。其結體則多法右軍。世之人徒見登善所書。或與薛稷類者。遂疑之。殊不知先哲有兼人之才。而其作字初不拘一體。張顛善草書。至其小楷。極端謹有法。傳其學者。唯顏真卿得之爾。觀登善者。宜以是求之。贊成雖號能鑒古。其言似不足徵也。國器尙永寶之。

孔氏譜系後題

神明之胄。莫盛於闕里。孔氏宜其文獻有足徵者。今濂觀其二家譜牒。則互有得失。姑舉其一二辯之。一譜云。順一名謙。生鮒。騰樹。鮒生隨。騰字子襄。生忠。忠生武。安國。武生延年。延年生霸。霸生福。福生房。房之從弟某生尙。安國生印。印生驩。驩生立。立之從弟吉。生何齊。樹一作祔。生聚。聚一作彥。生臧。臧生琳。琳生黃茂。茂生宜。一譜云。謙生鮒。滕樹。祔。鮒生育。滕生彥。貞。彥生成。貞一名忠。生武。武生安國。延年。延年生霸。霸之下不甚殊。安國生黃印。茂黃之曾孫尙。生疇。疇生賢。印生驩吉。驩吉生立。何齊。立生元。元生子建。茂生宜。樹三傳至琳。其後不書。祔生最。最生讓。讓生員。據前譜言之。則安國與武爲兄弟。黃茂皆琳之子。而驩吉爲兩人。尙乃霸之曾孫。樹卽是祔。聚一名彥。實樹之子也。據後譜言之。則延年與安國爲兄弟。黃茂皆安國之子。而驩吉只一人。尙乃黃之曾孫。祔卽非樹。彥實滕之子也。濂竊考之後譜。謂武生延年。安國者。據史記。前譜謂忠生武。安國者。據家語及前漢書。固各有所依憑。第司馬遷與安國同時。而班固乃出遷後。家語亦漢之諸儒所錄。似當以史記爲正也。孔叢子云。子國生子印。子印生仲驩。子國。安國字也。太史公云。安國生印。印生驩。皆不聞言驩吉者。非特此也。漢成紀。綏和元年二月。封吉爲殷紹嘉侯。三月進

爵爲公。恩澤侯表。綏和元年二月。孔何齊以殷後孔子世吉之嫡子。封紹嘉侯。或者雖疑父子不應同封。而吉固自爲一人明矣。漢劉琳府君碑。鉅鹿太守孔尙撰。尙自言承曲阜伯之裔。自伯魚至武十世。無封曲阜者。唯安國有之。尙爲黃之曾孫。亦無疑者。若鮒雖與祔同音。蔡文侯昭侯相去五世。皆名中。古人尙質。未必若是拘拘。有以二字音同而疑無此人。其亦過哉。孔氏五十五代孫克仁。以譜圖未備。有志於纂修之事。間請濂撰序以冠篇端。濂恨讀書不博。兼之老嬾多病。舊學廢忘。無以究知其詳。因略疏所聞。綴之卷末。孔氏孫子以學行知名者。代有其人。而克仁亦以文章家自顯。幸爲起其疵繆焉。

濂旣爲孔君題闕里譜系一書。復謂之曰。孔氏傳至四十二代光嗣。遭孔末之難。末乃灑掃戶孔景之後。欲冒襲封。於是盡殺諸孔氏。時光嗣爲泗水令。其妻張夫人生仁玉。始九月。夫人遂祕養之。及長。再襲封。卒贈兵部尙書。兵部生四子。曰宜。曰憲。曰冕。曰勛。今之南北裔。如曲阜之崇聖苗。孔二村所居。及若古一名傳。端友端朝之遷衢。端植之遷鄂。瑄之遷撫。瓚之遷吳興。皆其子孫。固不可以不謹其傳。而於正外二支。尤所當明辯之也。頗聞前輩言元貞二年二月。官中所定戶版。闕里正支。爲戶凡一十有二。分爲五位。所謂五位者。則太子中舍國子博士中散大夫侍郎襲封也。若外院孔氏。乃闕里子孫灑掃戶。每歲輸入祭祀錢者。其爲戶凡三十有一。分爲五院。所謂五院者。則宅上洙泗三傳文登寧陵也。子宜述其事。庶幾他日有所於考。而無涇渭混淆之患。孔君曰。此克仁之志。願爲我續書之。辭不獲命。復爲附麗題識之左。以爲後來纂脩者之一助云。

題孔氏所藏先世誥後

宋制差則出勅。除則給誥。誥有獎勵之言。而勅但書所授職事而已。然誥則用綾。其所職印章。文臣則用部。武臣則用兵部。王公命婦則用司封。加勳則用司勳。及元豐官制行。四選悉用吏部。而兵部唯施之於藩官。若差勅則書以白紙。而用中書門下印。印之。今觀金部郎中孔毅父所受誥。猶可以考見當時故時也。然而多歷年所。兵燹屢更。而子孫得以保守不墜。其亦君子之澤也哉。金部九世孫善夫。裝潢成卷。求題於濂。濂之所欲陳者。雲林先生危公已備筆之矣。謾略著其說。而附氏名於左方云。

題周益公所藏歐陽公遺墨後

歐陽公譜圖序。作於至和二年乙未。後一百三十一年。平園周益公得公所具檢囊一段。并嘉祐八年癸卯夜宿中書東閣詩八句。聯爲一卷。詩陰有中書所錄裕陵出閣親揮兩行。亦不棄去。而附見之。且各題其左。而識以中書省印者三。卷首又識以益國之章。其慎重之意至矣。平園與公皆廬陵人。故平生所敬慕者。於公爲尤切。文學政事皆欲並之。非止寶其字畫而已也。其後奉常質行定名。特與公同謚文忠。可謂能遂其志者矣。然平園題此卷時。乃淳熙十二年乙巳。方秉政樞庭。至十四年丁未之二月。始登右揆。其借用中書之印。當在此時。蓋宋世雖得以官印識私藏。若非親蒞其官。則亦不敢僭用之也。若論其封爵。則自十五年戊申。因明堂加恩。初封濟國公。十六年己酉正月。進左揆。再封許國。三月。拜少保。又更封益國。其封益國。乃在題卷五年之後。卷首之章。必後來追而識之也。今詩及譜圖序。並見居士集十三卷。

與六十二卷中其文皆同。唯詩改空作徒。爲稍異爾。裕陵爲光國公時。名仲鍼。及賜名頊。乃加忠武節度使。同平章事而封王矣。其事正在公東閣賦詩之年。九月辛亥平園之題。實與史合。或人弗之察。著爲文辭。謂爲十月者。其誤多矣。金華宋濂再拜謹記。

題朱文公自書虞帝廟樂歌辭後

朱徵公提舉浙東。嘗行部至三衢。大虞呂氏。適爲衢府法曹。遂往見之。公爲寫虞帝廟送迎神樂歌辭以贈。蓋公劾台守唐說齋。其疏凡六上。說齋方除江西提點刑獄。朝論遂掇其職。畀公公以言不行。即日解印綬去。此辭之書。正在衢聞命之時。豈堯舜君民之志弗遂。而有所遐思者歟。或云別自有見。亦未可知也。此帖出於立齋王剛中所藏。立齋初從劉摛堂游。而卒業於北山何氏。考其淵源之正。實有所自。故其寶愛尤爲深至云。

題黃文獻公所書先府君行實後

右黃文獻公乞銘於柳文肅公之狀。文獻公以學問文章名天下。此雖造次所書。而考據精詳。倫序不紊。事信而辭實。言遜而禮恭。皆可以爲法。不特字畫之美也。濂常執業二公之門。於是二公之卒已久矣。永念今昔。撫卷慨然。

題王魯公授少保致仕誥

右宋王魯公特授少保致仕誥一通。係紹熙元年五月二十二日所降者。蓋孝宗淳熙八年辛丑八月。魯

公由樞密使拜相。十五年戊申五月，以觀文殿大學士出判衢州。尋卽奉祠。十六年己酉二月，光宗受禪。八月，魯公以母喪致疾而薨。故年仍稱淳熙十六年。至十二月，始詔改明年爲紹熙元年。是爲庚戌之歲。誥之出給，合於魯公未薨之前。乃在旣薨未閱月後何耶？宋自宣和以來，未有旣死而乞致仕者。南渡之後，禮文凋喪，雖宰相輔臣，考終於位，其家已發哀卽服，降旨給賻，方上謝事之章，而朝廷復爲之告廷出命。如其未死時，此最有乖政理。其後吏部郎嘗以爲言，終不能行而止。此誥未免循習當時故事而未之或改也者。不然，誥中所謂尙克全於德履及益高冲致永介壽祺之語，皆生前事。何故追而書之，其爲後來補授制勅，當無疑也。惟魯公忠君孝親，大節偉然，故其相孝宗獨至八年之久。同時秉鈞軸者，唯梁文靖公。前後七年，可以配之。餘人皆所不及。謂非得君之深者，可乎？蓋必有其道矣。魯公五世孫葑，雅飭君子也。持卷索題甚切，會病店新起，精神昏昧，謾掛漏而書之。洪武十三年八月己未朔，前翰林學士同郡後學宋某謹識。

題張尙書具慶堂卷

世徒知父母之存爲具慶。至若人子能發聞於時，以顯榮其父母，父母雖歿，而有不歿者存，孰不爲之慶幸？斯亦可以謂之具慶。君子識之，而世人未必能知之也。錫山張君惟中，以碩學雄文，致位大宗伯。海外蠻蠻，無不知其姓名。其弟所安，又能慎守先緒，敬其兄如敬父。兄宦京師，數來省候之。久而後去，猶依依不忍別。士大夫咸指曰：是兄弟也。良可謂不死其親矣。故入其庭，升其堂者，榮光休氣，浮蕩於後先。儼若

二老人龐眉鶴髮。據筵笑語。此無他名不死。則其身如不死矣。爲其孀連。爲其僚友。莫不慶愜於心。豈獨其家之子若孫哉。不然。則父母雖存。名氏不出於里閭。聚散日逐於齊民。縱曰不死。與死相去。蓋無幾。雖日有三牲之養。其爲慶也隘矣。惟中伯仲舊以具慶名堂。近歲父母亡。墓上之木已拱。猶旦旦念親如存。若具慶時。每謂人曰。我父母未嘗亡也。嗚呼。可謂能孝也已。濂與惟中交最密。不翅異姓兄弟。故探其志而疏之。以附送所安序後云。

題周文矩畫狄梁公諫武后圖

右狄文惠公諫天后圖。相傳爲長安周景元作。以筆法重輕較之。蓋建業周文矩爾。非景元也。予於祕府多見二子真跡。故敢鑒定若此。未知賞識之家以爲何如也。若夫狄公拳拳存唐之忠。史書之。天下士大夫皆能道之。予尙何言哉。

題新脩李鄴侯傳後

余讀歐陽子等所脩新唐書。事多舛繆。如紀中載膠東郡公降封縣公。而傳中乃稱郡公。傳中敘天平節度四人。而紀中則云七人。此猶可也。宰相載於世系表。而于惟謙相中宗。鄭棨相昭宗。武什萬相武后。乃皆棄而不錄。此猶可也。觀其述作。繁者失於支蔓。略者過於簡率。以致渙而無統。鬱而弗章。則其所繫者重矣。劉胸舊史。義例無法。固不足責。豈意新史亦復爾邪。吳縝糾繆。蓋不得不作也。有若李泌在唐。建謀猷。輕爵祿。髣髴漢之留侯。新舊史皆略其事。且譏其好縱橫大言。以鬼道媚人主。取宰相。何其悖耶。晉王

府長史朱君讀而病焉。因據泌之子繁所錄家傳十卷。參考羣書。做前賢刪正陶潛諸葛亮二傳。芟繁摭華。重爲泌傳一通。泌之事始大白於天下。後世嗚呼。微朱君。泌不銜冤於九泉之下乎。然而唐史之謬。不止於此而已。續之所未糾者尙多。朱君宜推類以盡其餘哉。余總修元史及皇明日歷。朱君皆與其事。余見朱君有良史之才。故爲題識傳後。而屬望之如此。若余之耄。則無能爲矣。朱君名右。字伯賢。天台人。

題柳公權書度人經後

正書之擅名者。自魏鍾繇而至於宋。僅得四十四人。而唐柳誠懸實錚錚乎其間。則夫墨妙筆精。有不待贊矣。其入宋祕府凡六帖。而書度人經者二。此卷特其一爾。是經乃晉宋人僞作。至誠懸時相傳稍久。故信而書之。近代紫陽方回則謂五季蜀王建時道士王喬始造。且確然弗自疑。不幾於大可笑歟。使回見誠懸書此。吾知其類有泚矣。

題陳忠肅公疏文跋語後

七峯居士諫議陳公。因上書論日錄事有忤曾布。出守海陵。尋謫武巨祠官。未幾除名。勒停編管宜春。崇寧二年正月移合浦。三月五日過長沙興化寺。遇神宗忌日。於是依浮屠法運轉經藏。造疏六千言以薦嚴事。疏文用駢儷體。恐不足以盡意。仍以散辭分注其下。首序請改實錄言蔡卞者九事。非國是者七章。其餘辯布之姦。凡所以尊私史而壓宗廟者。無不縷列。既燔告神皇在天之靈。是月十五日。復以別本綴於元豐中王安石所貽手帖之後。又假設臣布引咎之辭。作跋語繫之。且手書二通。一遺其姪正裕。一寄

其甥李進祖。俾祕藏之。身死之後。出示親戚朋友。冀幸有知之者。蓋公嘗自謂家覆身亡。如浮瀉起滅。不足深計。唯神考十九年。駿烈茂功。受誣羣小。爲臣子者。不得不辨。故其所著之書。曰日錄。不合神道論。曰辨誣論。曰尊堯集。曰自撰墓志。墓志述因日錄殺身之由。其言至一萬八千有奇。而語尤哀切。然而諸書大抵皆疏文并跋語中意也。嗚呼。公之愛君尊主之誠。耿耿弗忘如此。真所謂忠精貫日月者矣。烏傷王君禕。其八世祖永年。令仙居時。而公之冢子正彙。實爲尉。交契之深。遂以其女歸仙居之子嚴州司法儻。今王君家藏跋文。正假託臣布引咎之辭。豈或正裕所祕藏者。而正彙出示於親戚歟。今去公造此文時。已歷二百四十二年。中更水火兵革。靡所不有。區區一紙之微。初非所謂金相石質。乃能傲兀無窮。世變手澤如新。殆造化者使神物護持。昭示來裔。以遂公忠憤之志。而永曾蔡之惡於弗磨也。吁。可畏哉。王君與濂爲同門友。而義若弟昆。間以相示。因忘其孤陋。而僭書之。若夫君子小人進退。有繫於家國安危者。史臣褒貶。已有定論。茲不復勦說云。

題天台陳獻肅公行狀後

濂過濠梁。天台王公完出考亭。朱子所撰陳獻肅公良翰行狀。徵濂題識。朱子之文。古今共尊。何敢贊一辭。若公事行或有闕遺。亦學者之不可不知也。按宋孝宗實錄云。乾道五年十二月。樞密都承旨張說奏。請置酒延諸侍從。上許之。說退。約客獨兵部侍郎陳良翰不至。說殊不平。上遣中使賜以上尊珍膳。說因附奏。臣奉旨集客。而良翰不至。是違聖意也。已而上命再賜。說復附奏。良翰迄不肯來。夜漏將上。忽報中

批陳良翰除諫議大夫。坐客皆愕然。此與唐明皇時。宋璟御王毛仲事正類。非有剛直之操者。孰能與於斯哉。夫自姦檜主和議。而史浩。湯思退繼之。牢不可破。孝宗恢復之志。雖上通於天。終莫之遂。不主和者。惟張浚。胡銓。張闡。張震。及公等數人而已。公平生大節。此最彰著。故朱子特詳列之。而舍拒說細行。亦紀事之體當然耳。然而朱子脩通鑑綱目。環之事何嘗不載。況孝宗之知人。賢於明皇遠甚。亦法所合書。豈當時弗知耶。抑偶忘耶。實錄舊藏元之內府。革命後竟不知所在。狀中既不收。脩宋史者復失於采輯。周公謹紀孝宗聖政。雖曰具錄。又誤指爲同時從官陳良祐事。濂恐後人無所考焉。特爲補闕。授諸公完使藏焉。公完字繼遠。公之七世孫。今出後王氏云。

題趙魏公書大洞真經

此卷乃趙魏公六十三歲所書。至精至妙。非言辭贊美可盡。蓋公之字法。凡屢變。初臨思陵。後取則鍾繇。及羲獻。末復留意李北海。此正所謂學羲獻者也。舊嘗獲見周侍御家。侍御旣坐貶竄。竊意必歸天上。不知復流落人間。今得披玩累日。抑何幸哉。殷卣周爨可得。而此卷不可得。博雅君子。尙思謹祕而傳焉。

題趙子昂馬圖後

趙魏公自云幼好畫馬。每得片紙必畫。而後棄去。故公壯年筆意精絕。郭祐之作詩。至以出曹韓上爲言。公聞之。微笑不答。蓋亦自負也。此圖用篆法寫成。精神如生。誠可寶玩也。

題趙子昂書招隱卷後

右趙魏公所書招隱士一篇。公自大德三年八月。改集賢直學士。行江浙等處儒學提舉。至七年十月。已閱五載。而公年亦五十矣。鄉先生方君壽甫。從其父巖南翁游杭。提舉官署時寓於杭府。故先生得見公。而請書此卷也。卷左有翰林待制柳公長蘅山長吳公題識。二公皆濂所嘗師事者。九泉不可作矣。披玩數四。不覺淚落紙上。

題北山先生尺牘後

右北山何公與其弟子魯齋王公手帖。北山平日執謙特甚。人有來學者。雖誨之無不傾盡。而未嘗受其北面之禮。此書之稱再拜稱尊兄者。猶可見也。元思姓汪氏。名開之。時法先生之孫。魯齋少與之同學。嘗取論孟集義。別以鉛黃朱墨。以求朱子去取之意。而精於四書之學者。伯誠姓張氏。名潤之。自號思誠子。登北山之門垂三十年。其微言奧旨。莫不盡聞焉。二公偶出北山念之。形於簡牘間。則其於師友之道。可謂篤矣。王子文名埜。嘉定十三年進士。襄蜀事急。議遣使講和。宰相依違不決。史嵩之帥武昌。首進和議。子文時爲樞密院編脩兼權檢討。謂今日之事。宜先定規模。并力攻守。士論韙之。北山雖居山林。而憂國之切。故有廟堂議和。子和除擢之間。則其厚於君臣之義。又何如哉。夫以北山之學。承朱子再傳之緒。造詣真切。踐履純固。而其見之翰墨。雖出於一時。皆有關於世教。有益於人倫。似無斯須不志於道者也。是誠何可及哉。朱子之書。盡編者以時事出處問答分類而通載之。凡四十一卷。約一千六百八十餘篇。濂每疑其太泛。魯齋之所選。北山之所定。當必甚精。惜乎未及見之也。因并識之。以爲寡陋之愧云。

題潘內史贈別墨本

太康陸君子廣喜佛氏言。以內史舍人潘佑贈別序文能發明先佛遺義。近於白下得墨本。承以匡廓。緣以色緙。揭寘坐右。以自省。間徵予識。佑事於下方。按佑幽州人。能文辭。與徐鼎臣齊名。仕於南唐。自祕書省正字累遷中書舍人。當後主時。國事日蹙。佑極憤切。累疏論列。至謂不能與姦臣同事亡國之主。張洎從而擠之。後主乃收佑屬吏。佑遂自剄。前史馬元康誣佑溺淫祀左道。斥爲人妖。陸游作南唐書。能辨其妄。固爲甚當。及游論佑。則譏其學老莊。齊生死。故其上疏。若惟恐不得死者。則又未免涉於深刻也。人之所欲。莫甚於生。雖愚不肖之人。亦不輕以畀人。況賢知有如佑者乎。直以忠義所激。乃視死如歸耳。佑之死。其心無白之者。鼎臣作江南錄。亦沒而不書。及藝祖命曹彬南征。指殺佑爲殺忠臣。於是其事始著於後世。於戲。爲人如佑。尙不免議者之口。人之不樂善。乃至此哉。王介甫嘗作文評鼎臣。至於游之所論。未有指其非者。故因子廣之請。而極言之。清源王古。刪晁明遠諸書爲道院集要。全載此文。以簡牘爲簡牋。薺芥蕙窘束爲跼促。亦微有不同。要當以石本爲正。

題許先生古詩後

文懿先生許公嘗賦秋夜感興詩一十二首。錄寄其友吳公正傳。至元末。吳公自建德尹入教國子。旣已謹志其事。俾陳監丞衆仲題於卷後。他日閱篋衍。又得先生遺興詩十首。吳公手鈔綴於前卷。復與衆仲各有論識。衆仲之言。病夫世之論詩。有儒者詩人之分。而謂先生獨能兼之。可謂知言。而無復遺憾者已。

龍泉章君三益。久慕先生之學。近獲此卷於吳公之子溶仲。將琢石勒真龍淵義塾。以濂頗與聞先生之道。請申言之。夫自陳伯玉倡爲感遇詩三十八首。而李太白繼作。遂衍爲五十有九。君子稱其得風雅之正。至於文公朱子感興之什。其數比陳僅餘其半。方之於李。則將闕其三之二。言辭固若不多。然於太極陰陽之微。家國治亂之由。異端害道之故。無所不及。非惟二子不能道之。黃初而降。大歷以前。吾恐未有臻斯理者也。今先生之詩。其音節則倣二子。而絕仙佛之誕。其旨趣則本文公。而寫性情之真。雖言無統例。與朱子少殊。而其寄咏之深。隱憂之切。實有出夫二子之外。其於傳世。固無疑者。而濂於衆仲之言。則不能無所感焉。詩文本出於一原。詩則領在樂官。故必定之以五聲。若其辭則未始有異也。如易書之協韻者。非文之詩乎。詩之周頌。多無韻者。非詩之文乎。何嘗歧而二之。沿及後世。其道愈降。至有儒者詩人之分。自此說一行。仁義道德之辭。遂爲詩家大禁。而風花烟鳥之章。留連於海內矣。不亦悲夫。於是衆仲之歿已久。而吳公亦不可見。無從質正。始因三益之請。爲書其末。以足衆仲之所未言。雖然。濂之語激矣。夫豈知詩者哉。

題金德原和王子充詩後

右德原金先生所和子充王君詩。凡一百九十韻。時子充在金陵。因黃主簿之官。烏傷作詩餞之。遂於鄉中舊游。深致意焉。詩止一百二韻。凡增多八十有八者。乃先生引而伸之也。濂嘗力疾起讀。非惟波瀾浩渺。不可涯涘。而其念鄉學之美。思官政之治。實有得古人風勸之義。視彼撫華摘豔。取合於一時者。不翅

天淵之懸隔矣。昔者柳柳州同劉賓客述舊言懷寄澧陽張使君五十二韻之作。因其韻增至八十通贈二君。今其詩尚存。要不過流連光景。嘆悼無慘者之辭耳。雖其觸類盡意。不厭其多。與先生略同。至於有關世教。足以增夫彛倫之重。則識者當謂先生之詩爲不徒作也。先生氣雄而言腴。發爲文章。尤雅健有奇氣。又不但長於詩而已。先生爲己之功深。不自表襮。唯濂知之爲獨至。故題諸詩後。以志慕豔之私云。

題呂仲實詩後

右呂忠肅公詩一章。爲蒲圻魏君觀作。初公爲集賢大學士。因爲議錢幣事。與丞相脫脫不合。翩然東歸。蓋至正庚寅十月二十日也。後四年甲午二月。起公爲湖廣行省左丞。會天下兵亂。道澀不能前。至十二月八日。始抵治所。是時已有中書左丞之命。明年乙未正月二十九日。使者至。閏月十三日。卽上道。故詩中有左丞兩月餘。及今又入中書之句。又二年丁酉三月十一日。而公薨矣。惟公早師蕭貞敏公。傳道德性命之學。真知實踐。故其立朝大節。極有可法。篇章散落於四方者。固宜寶之。如魯敦周爨。傳之於子若孫也。濂與魏君交甚洽。故略疏公出處歲月於詩後。使讀者或有所考焉。

題王黃華詩彙

予在江乘。偶得黃華山主王庭筠子端詩彙三首。一首絕句。次彥高問疾韻。二首七言律。次許子靖題光華堂韻。彥高當是翰林待制。吳激乃王履道外孫。米元章之壻也。筆法遒勁。得於婦翁爲多。許子靖名安仁。大定七年進士。歷禮部員外郎。出守高平。後以汾陽軍節度使致其事。二公皆當時知名之士。子靖登

第。蓋先子端九年而彥高與子端之父遵古游。尤號前輩。今觀其勞問酬答。所以敦忘年之契。甚至。此在二公固爲盛德。而子端文采蘊藉。爲一時之所景尙者。於斯亦可槩見矣。子端熊岳人。官止翰林脩撰。字法初。做元章。謫鄭州後。氣象橫放。自成一家。予甚愛之。故識其後。持歸金華山中。以示子孫之嗜書者。或曰。彥高與子端相去頗遠。恐或別是一人。余亦未能深知之也。

題王庭筠秋山應制詩藁

金源之制。每歲以正月如春水。九月幸秋山。五日之間。羣臣一進起居表。其嚴慎如此之至者。志非在於田游。將欲脩兵政。而紓民賦也。道陵如薊門。至秋山。河東王庭筠以翰林脩撰扈從左右。應制賦詩三十餘篇。甚被獎眷。蓋自大定以來。累治重熙。文物聲名。可擬漢唐。故其一時君臣遇合。天施地受。雨露無際。緣物引興。浹於太和。此乃金極盛之時。奈何盛極忘治。詒謀匪遠。僅一再傳。翠華遙遙南狩。而秋山者則已委於沙塵烽火之區。武元文烈諸孫。雖欲求一乳兔而射之。尙何可得耶。觀庭筠之詩。而感慨係之矣。自當時言之。孰不效上林羽獵。以侈大榮觀。而庭筠乃能以秋山不合圍爲風。則庭筠者亦良士也哉。此卷庭筠所具之藁。惟十四首。而逸其大半。詩序中所謂九日。正泰和元年九月丙辰。然道陵以是月七日甲寅發京師。二十九日丙子。至自秋山。道塗所歷。凡二十有三日。其幸香林平頂山溫泉等什。皆可以次而推。至若牡丹醪醑松影三詩。則不知作於何時。按庭筠以明昌三年。供奉翰林。五年八月。遷脩撰。未幾謫鄭州防禦判官。承安四年。復起爲應奉翰林文字。泰和改元。又轉脩撰。明年遂亡。壽甫四十七爾。詩既

題曰奉旨而作。雖不能必於何年。其決在禁林之日矣。

題危雲林訓子詩後

古之人教子。多發爲聲詩。何哉。蓋詩緣性情。優柔諷詠。而入人也最深。韓昌黎之子符讀書城南。嘗作詩送之。曲盡其意。至今讀者猶蹶然興起。豈曰小補之哉。雲林先生危公冢子某。字於臆。自檢討奉常遷佐薊州。先生時辭嶺北行省左丞。獨居房山。聞於臆將之官。賦四言詩一章勉之。嗚呼。先生之詩。固無愧於昌黎。而符能讀父書。策名南宮。今於臆以明經擢進士第。君子亦竊謂似之。或言古今人不相及者。其果可信歟。雖然。先生所作。於脩己治人之道。反覆備至。是有闢名教甚大。不特可施於訓子而已。其視誘之利祿。而以惜居諸爲念者。又爲何如哉。知言之士。必能辨之。

題鄭北山追復誥後

故責授濠州團練副使鄭忠愍公。與責授祕書少監分司南京贛州居住孫近。同奏復資政殿學士。其日乃紹興二十六年之正月甲子。距秦檜之死。纔四月耳。今勅後云二月九日。乃誥下之時也。所謂良臣姓魏氏。該姓沈氏。奏與遠。則周趙二人也。會予有千里之役。始獲見此卷。走筆識之。殊不暇詳。若夫公之大節。與賊檜之姦。諸先正已極論之。亦不待詳也。

題顧拙軒誥命後

右拙軒先生顧公誥命一通。公諱周卿。字成子。仙居人。嘉定癸未。賜進士及第。任慶元府奉化縣主簿。階

脩職郎。故事脩職郎滿三考。關陞令錄。先以合入階官給誥。公遂入從政郎。久之始注授監嘉興府鮑郎鹽場差遣。然舊制無從政郎。崇寧初以通仕郎易錄事參軍縣令。至政和中復改以今名。乃選人七階之一也。此告之首。當有十幹暨千文紀號。若曰甲天等字第幾之類。其尾復欠紹定五年七月十三日下十字。其背紙又當書行在官。告院準鈔出給。及寫告楷書。當行手分令史主事等名氏。而守當官批上本官告命照會。亦繼其後。歷年之多。皆未免殘闕爾。吏部主事碩公之六世從孫琢玉爲軸。重加裝褉。持以相示。故爲詳書之。以備當時典故云。於戲。世家舊室。何處無之。未一再傳。不知祖諱者有之矣。如碩者。豈非賢哉。豈非賢哉。

題趙模千文後

右內率府錄事參軍趙模集右軍行書爲千文。模在唐有能書名。嘗與韓政、諸葛貞、馮承素等奉勅臨摹蘭亭。逮今猶有存者。予於祕府頗見之。最喜其善用筆。而正鋒恆在畫中。所以度越諸人也歟。此本係鮮于奉常家藏者。神采尤沈著不露。可寶也。

題褚書千文

褚遂良書見於石刻者。世亦甚鮮。況其真蹟乎。今觀所書千文。柔勁險媚。真如鐵綫縈結而成。或者評爲柳誠懸所臨褚書。似則似矣。其入神處。恐非誠懸所至也。

朱悅道文彙後題

右烏傷朱君悅道所爲文一卷。予讀已愛其理明文順。顧謂二三子曰：辭章之弊久矣。楛蠟爲葩。以逞妖豔。非不眩人目睛。比之元氣流行。千紅萬紫。徧發洛陽名園。固自弗侔。何也。生意之動盪。與死色之不澤者。其可以並論也哉。蓋古人之於文。以躬行心得者著爲言。言有醇疵。但繫乎學之淺深爾。後世則不然。以文學文。皆僞度想像而爲之。知道君子未嘗不一笑擲之也。今悅道之文。論議必本諸經。而翼以濂洛關閩之說。旣履康衢矣。長安雖遠。惡有不至者哉。其視顛連榛莽之蹊。而虎豹蛇虺縱橫交於前者。奚翅萬萬。悅道非惟見諸空言。又思踐履以驗之。此尤度越於人人。予雖留意於文。造道不深。而出言多疵。深有愧於悅道。雖欲痛自懲刷。而秋髮繽紛被肩矣。惜哉。予期悅道甚遠。悅道器宇清粹。誠足以副予所期。他日道明德立。而文益昌。予當在知言之列無疑。故錄與二三子言者。題其卷後云。

題永新縣令烏繼善文集後

世之學者必有師。雖百工伎藝之微。亦必有以相授。然後能造其闢奧。況爲文者。發造化之祕。貫今古之統。苟無以管攝而闡之。則何以盡其變化不測之妙。其不傳之於師。奚可哉。吾鄉脩道先生胡公以光明正大之學。發於精深嚴簡之文。訓迪學子。篇章句字皆有法。往往從之者多得文之旨趣。其所造固有淺深高下之殊。而體裁終不失於古。四明夢堂。雖居浮屠中。能久與先生游。先生爲文之法。實與聞之。烏君繼善自幼學文於夢堂。凡先生所指授者。悉以語烏君。故烏君之爲文。峻潔如明月珠。起伏如春江濤。因語二三子曰：必如烏君。然後可以言文也。若無師授。其可易致是哉。予嘗譬之。有美錦焉。使朝市

繞人製之。則能中度可適體。委於巖穴之粗工。則左低而右昂。上侈而下斂。錦固錦矣。其如不合何。文之無師授者。亦若斯而已。予老且多病。文字一切謝去不作。縱有一二。多仰手於人。獨喜烏君之文。親題後而歸之。嗚呼。予生也。雖居先生之鄉。而不能傳先生之學。其於烏君。又豈能無慊於中哉。烏君名斯道。繼善字也。明之慈溪人。嘗知化之石龍縣。今調吉之新水。其爲人溫然如玉。蓋與相稱云。

題栲栳山人詩集後

餘姚岑公靜能志節之士也。其居鄉也。人皆敬而憚之。是何也。其出言可爲世則。其制行可爲世範。所以名聞之家。雖至凋瘁。多藉之以自立。崛起寒微之輩。縱富埒公侯。亦不爲凌躐之事。設有之。往往私相謂曰。岑先生莫知之乎。復退縮不敢吐氣。或者不知。徒謂公爲詩人。嗚呼。公果詩人也哉。廣西部使者虞察魯瞻。其鄉中子也。力請予題。聊紀公之賢行。以示讀公詩者。

題鮮于伯機所書蘭亭記後

鮮于奉常公嘗見葉秋臺書。反覆諦視。至欲下拜。秋臺之書。人頗譏其陋。公獨知其用筆之妙。字學雖淺。藝非功力精到。亦不足以相知。況其他者乎。予藏公所書濟石硯賦。自謂可入妙品。今觀此卷。實可與之抗衡。非真知書中意者。未必以予言爲至當也。

題剡源清茂軒記後

剡源先生戴公以文辭名天下。曾未百年。學者鮮有見其全集者。予總脩元史。欲爲先生立傳。於是白丞

相下有司。卽先生之家。謄其文彙二十卷以上。至今藏之祕府。中書舍人毛君集出示先生所造清茂軒記。正在彙中。其爲眞筆無疑。蓋毛君從祖震卿。與先生爲忘年交。故先生不靳而爲之記。發明山水之勝。分明如畫。今之能文者。雖多如蝟毛。求如先生絕不可得。毛君乃能重書以傳。亦可謂賢子孫矣哉。

題危太樸隸書歌後

學必博而後所見精。非惟諸經奧旨皆當研摩。至於隸書之學。漢魏以來。其運筆結體多不同。苟不歷考其變。何以充其知識。而祛流俗之陋哉。吾友危先生太樸。作隸書歌一篇。贈四明汪君大雅。備括諸碑之所自。且歷疏之。麀麀千餘言不休。嗚呼。世以空虛之學。浮談強辨。如蠶起泉湧者。視此曷知愧哉。大雅方以隸學知名於時。復能惓惓於先生之詩。裝潢襲藏。惟謹。則其尙德之心。爲不可及已。

題東陽二何君周禮義後

世有恆言。決科之文。不足以行遠。嗚呼。豈其然哉。顧其合道與否。爲何如耳。昔呂成公之編文鑑。其用意寔精密。而張廷堅所著尙書義二篇。特載入之。與龍圖序諸文並傳四海之中。但識字者皆知誦之。苟謂其不能行遠可乎。東陽何氏。宋季多以科目發身。內舍生。夢申與其弟參知政事。夢然所作周禮義各一首。皆近道之言。較之廷堅。未見其不及也。五世孫觀光。惟恐失墜。裝褉成卷。求予題而藏之。亦可謂孝子慈孫者矣。

題余廷心篆書後

右四大冢。函國忠宣公。余闕爲浦陽戴君叔能書。至正九年。公持使者節來鎮浙部。濂借叔能往見。公獎厲甚。且各書齋扁爲贈。公去浙後。江南大亂。荆楚之域。皆爲僞漢。陳友諒所據。公時以淮南行省右丞。分治安慶。安慶前後皆盜區。公獨守六年。小大二百餘戰。未嘗敗北。不幸糧絕。城陷。公遂赴水死。君子稱其大節。與日月爭光。信哉。公文與詩皆超逸絕倫。書亦清勁。與人相類。然其忠義之氣。可以懼亂賊。清惡厲天地。因之以位。君臣藉之以定。斯豈細故。雖所書不工。猶當傳之萬世。況能臻其妙者乎。此紙所在。定有神物呵護。見者當如張中丞之詩。段太尉之笏。聳然起敬。不可徒以翰墨視之。公唐兀氏。余闕其名也。字廷心。一字天心。元統元年進士。世居武威。今爲合肥人。翰林學士金華宋濂謹題。

題張泐和陶詩

陶靖節詩如展禽仕魯。三仕三止。處之冲然。出言制行。不求甚異於俗。而動合於道。蓋和而節。質而文。風雅之亞也。他人欲效之者。雖衆。然樂澹泊則蕩而弛。慕平易則野而穢。惟蘇子瞻兄弟以雄邁之材。氣勢可與之相敵。然其辭旨則亦遠矣。豈不誠難乎哉。今之和陶者。余嘗見數家。最後見句容張泐文伯。自九日閒居以下。皆和之。至詠荆軻而止。諸四言及形神釋桃源等什。則不和。恐難繼也。文伯產江淮間。喪亂之餘。獨能致力學問。以追古之作者。其亦有志者哉。

題太平策後

昔成宗皇帝臨御萬方。以天下之廣。非一人耳目所及。羣臣有直言極諫者。咸嘉納焉。所以來讜議。達羣

情而成治功也。大德中，三衢鄭以吾宿衛禁中，覽時政有所缺遺，疏太平策一綱二十目上之。上嘉其忠，特命以吾爲雷陽教授。濂每取而讀之，未嘗不仰嘆成廟之德之盛也。隋文帝時，河汾王通非不以太平十二策奏之，文帝不能用。通遂東歸，續六經以傳學者。嗚呼！以吾之賢，未必能有過於通也。上猶采其言而用之，使通生於今日，則其道必將大行於時。六經有不必續矣，由是論之，不惟成廟之聖，非隋文髣髴其萬一，亦可以見士之遇合，苟當明時，雖小善必錄，若值猜暴之主，縱大賢亦有所不容。道之所繫於時者，夫豈人力之可爲也哉！豐陽張君逢喜，誦以吾之策，嘗手錄之，且請濂識之。於是不辭而題於後，重紀至元元年夏六月十九日濂題。

題史內翰書

右歸去來辭一卷，大名史公奕與定五年所書，以贈李澥者也。公奕字季宏，大定二十八年進士，再中博學宏辭科，累遷著作郎，翰林脩撰，同知集賢院。後以直學士致仕，文章書翰，皆有故老遺風。所著洄水集，尙傳於世。澥字公渡，湘人也。少學詩於王內翰子端，亦工行書，不失前輩典型。累舉不第而卒。然自黨文獻世傑趙郎中文孺任判官，君謨趙尙書周臣諸公，先後疊起，風聲氣習，濡染爲深。故金之士大夫多以善書名家。觀季宏公渡，則其餘蓋可見矣。季宏性雖溫厚，每靳與人書，今特爲公渡贈者，豈非同聲相應者乎？宣宗自改元與定之後，國政愈非，而疆土日蹙，古人之文何限。季宏之不書，而獨拳拳於是辭者，意其先見亡兆，而殆將隱歟。距作此紙時，僅踰十年，而金社遂屋矣。吾黨閱此卷者，又當於此求之。

題朝夕箴後

右朝夕箴一名夙興夜寐箴。凡二百八字。南塘先生陳公之所撰也。先生諱柏。字茂卿。台之仙居人。與同邑謙齋吳梅卿清之直軒吳諒直翁父子游。而深於道德性命之學。蓋自謙齋從考亭門人傳其遺緒。而微辭奧旨。先生得之爲多。當時有慥堂鄭雄飛景溫輩。行雖稍後。而事先生爲甚謹。人以其學行之同。通以四君子稱之。今觀先生之著此箴。本末明備。體用兼該。非真切用功者。當不能爲是言。鄉先生魯齋王柏會之讀而善焉。以教上蔡書院諸生。使人錄一本。真於坐右。則其所以尊尙者爲何如哉。嗚呼。前脩日遠。後生小子。不知正學之趨。惟文辭是攻。是溺志亦陋矣。濂故表而出之。并繫先生師友之盛於其後。以勵同志者云。

韻府羣玉後題

右韻府羣玉一書。元延祐間新吳二陰兄弟之所集也。二陰一名時夫。字勁弦。一名中夫。字復春。博學而多聞。乃因宋儒王伯祿所增書林事類韻會。錢諷史韻等書會粹而附益之。誠有便於檢閱。板行於世。蓋已久矣。入我聖朝。近臣奉勅編洪武正韻。舊韻音聲有失者。改之。分合不當者。更之。定爲七十六韻。今重刻是書。一依新定次序。而字下所繫諸事。並從陰氏之舊。因書其故。以告來學者。洪武八年夏五月既望。翰林侍講學士金華宋濂記。

新刻廣韻後題

右廣韻一部。雕刻已完。可模印。然自梁沈約制爲聲韻以來。隋仁壽初。陸法言等纂次成編。唐儀鳳末。郭知元復帥其屬而附益之。時號切韻。天寶中。陳州司法孫愐以切韻爲繆。略復增字四萬二千三百八十三。雅俗兼收。務於該博。且取周禮之義。又更名曰唐韻。宋祥符初。陳彭年。丘雍復重脩之。又易名曰廣韻。至於宋祁景祐集韻之出。復增二萬七千三百三十一字。而廣韻微矣。近代書肆喜簡而惡繁。集韻罕傳。而廣韻獨盛行。濂等奉勅校定。一遵洪武正韻分合之例。布列如左。註則並仍其舊。舊韻凡二百又六。今省爲七十六。云。洪武九年九月壬子朔。翰林學士承旨金華宋濂記。

題省心雜言後

省心雜言一書。刻於虎林西湖書院已久。序之者謂和靖處士林逋所作。世之鉅儒頗疑焉。且云逋之所優者詩爾。至於法語格言。可以垂世而範俗者。逋或未之有聞也。復定爲河南和靖處士尹焞所撰。豈不以焞爲程門高弟。而談理乃其所長耶。然而呂稽中作焞墓誌銘。載焞奉詔撰論語解之外。他無所著書。是則以逋和靖之號。偶同於焞。因嫁此以誣之耳。殊不知鄉先達敬巖王公。秘所編朱子語錄續類之書。其第四十卷雜類篇云。省心錄乃沈道原作。非林和靖也。朱子完經翼傳。其言行世。若揭日月。蓋必有所據矣。當以沈道原作爲正。夫以近代新出小書。以理度之。亦甚易知爾。尙或不能詳其所著之人。而妄以意見言之。況於千載之上者哉。噫。

題易庵卷

余聞老易相爲用也久矣。至於魏伯陽著書明述卦候之旨。而後世丹經成祖之。此不獨形之空言。而實見於行事者也。治城道士王君宗懋。名其丹室曰易庵。吾友危學士嘗爲之記。復請余跋其後。嗚呼。太極其鼎爐者歟。坎離其藥物者歟。陰陽其火候者歟。王君嘗有識於此矣。若夫開物成務。隨時變通。蓋出於三者之外。非更僕不能盡也。尙容他日爲王君言之。

題甘節卷後

地天爲泰。純剛純柔之卦也。節自泰來。則柔來節剛。剛上節柔。恐其剛柔過盛。而無節也。故當節之。然節至於苦。則不能常決。非貞之道。又必至於甘節。從容悅豫。而無窘束之意。乃爲人情之所尙也。易之所謂甘節者。其大意蓋如此。鹽城孫君子章。僑居吳郡甘節里。因以甘節老人自號。然孫君篤厚長者。居鄉多善行。而每事有當節者。輒節之。自苦以至於甘。婆娑嬉游。以至終身。然亦未嘗過也。揆於易卦所謂節者。施之一身。不幾亦有合歟。孫君之子化。以能古文辭名世。朝廷聞其賢。徵爲侍儀。使名聞之升。正騰騰未已。是則甘節之亨。又當復見於此矣。

題苦寒詩後

亡羊先生多與余論詩。大概以句豪韻險爲工。此篇法韓退之。而尤務出奇者也。精於詩者。必能辨之。

題禊帖

唐太宗詔供奉官四人。臨摹禊帖。趙模、諸葛貞得其筆意。湯普徹得其形似。而馮承素於形意二者兼有。

之。此卷精神飛動。下於右軍真蹟一等。其或出於承素者歟。

題悅生堂裱帖

右蘭亭悅生堂本。係宋相賈師憲命其客廖瑩中參較定武諸本。采字之精善者。輯成一帖。始命金華良工王用和勒石。經一年乃成。寘諸悅生堂中。尋補用和武階以報之。濂按師憲遭竄逐時。朝廷命王孟孫簿錄其家。石刻蘭亭多至八千匣。當時方回奏劄亦頗及之。度其所藏者善本必多。故廖所采輯薦紳家號爲至精。先師內翰公嘗摹搨爲卷。而以趙文敏公所臨者繼其後。誠可謂雙絕矣。公之孫仲穆能寶此卷於戎馬劫灰之餘。穆亦賢乎哉。

題棲雲軒記後

余往年讀劉元靖山棲志。見其所載紫岩靈岩勝概。分明如畫。時正當祥暑。不覺涼颺生肘腋間。今年夏六月。客有授予蘇太史棲雲軒記。記爲本庵上士作。其狀靈岩之景。亦分明如畫。蒸溽爲之頓消。嗚呼。因文辭而想見其處。雅興遄發。尙忘其時之燠炎。况親睹鬼眼瀕耳之勝者乎。蓋元靖久棲此山。太史亦嘗出游覽。故其言真切。有足以動人也。何文定公跋山棲志。有云。想元靖一時飛屐。上下千峯。紫翠間。左浮丘而右洪崖。其風致猶前日也。余今於太史之文亦云。若夫雲幻非幻。弊經多言之。苟欲重宣其義。非千百年莫能盡。他時或造山中。當敷坐於巒光水影間。爲上士說法未晚也。

題壽昌胡氏譜後

君子之所爲。貴乎有微。昔者孔子修五經。書斷於唐虞。詩起於關雎。春秋自隱公始。或餘繁以辭。或從而定之。未嘗敢增益也。其慎且敬如此。故孔子之經。傳百世而人莫能非之。及司馬遷作史記。遠泝博索。於孔子所不敢述者。皆采而實之。其事雖備。而去闕疑之意遠矣。其備也適足以爲誣。何取其能博哉。族之有譜。所以紀所自出。實則爲尊祖。僞則爲誣其先。而亂其類。不孝莫甚焉。近世之士。不察乎此。多務華而銜博。或妄爲字名。加於千載以上不可知之人。或援他郡異族之貴顯者。以爲觀美。其心非不以爲智。卒陷於至愚而弗悟也。壽昌胡氏則不然。於既遠者皆不敢有所載。獨自有其徵者錄之。得十有五世。詳親而略疏。考訛而傳信。附其遺文及當時所受制命之詞。皆蔚然有敘。是可謂善學孔子者矣。嗚呼。不知而妄作者。其能無媿於斯哉。脩譜者名榮。來京師而以示余者名翰。皆善士云。

題金谿劉氏族譜序

金谿劉貫以雲林先生危公所製宗譜序示予。且聞世裔之詳。卓爲其邑之鉅族。衣冠文物。炫燿江右。若其造譜之次第。則自十四世祖宗元。由南豐來遷之後。其八世從祖虛妙大師道正。遂建脩真觀。而於觀側樹祠。以祀劉氏羣主。其六世祖國子博士堯夫。乃刻本支之詳於石。植諸祠下。號永善族圖。其祖介福。又倣大小宗法。爲圖鋟版。懸於家祠。其世父傑。復集二圖。著爲書六卷。是則先生所爲序之者也。遭世不靖。碑裂而版燬。貫抱其書。避入大山中。幸而獲存。珍襲寶愛。惟恐逸墜。今思有以永其傳也。復來徵予言。以厠先生雄文之後。予也不敏。於先生無一日之雅。先生不以爲疏。謬力薦諸朝。以布衣詔入史館。雖於

辭章或未之學。得忝名氏於先生下風。不亦幸歟。予竊聞之。劉氏之別有五。帝堯陶唐之後。受封於劉者。此爲祁姓。以國爲氏也。成王封王季之子於劉者。此爲姬姓。以邑爲氏也。項伯婁敬之後。而皆爲劉者。此漢之所賜姓也。他若雕陰東郡等族。或爲劉者。此亦漢以宗女妻冒頓。冒其母姓以爲氏也。大抵雕陰東郡之裔。多居恆代。項婁之宗。盛於山東。姬氏之傳。至漢末而無聞。唯祁姓之分爲士會。士會後昆。周末遷於魏。又自魏家於豐。至劉熾執嘉。子孫極爲貴盛。而布列於南北矣。然而江左之劉。則祖於散騎常侍弼之後。江右之劉。則出於游擊將軍握之胄。此皆見諸紀載而無疑者。但其世次難明。不知從握至宗元實爲幾傳也。姑附其說於此。或可以爲脩譜者之一助云。雖然。先生博極天下之書。爲時儒宗。而於氏族之學。攷覈尤精。當必有以告貫。先生他日南還。貫尙以予言而取正也哉。貫字孟唯。質美而有文。作詩得六朝體。且於譜圖倦倦而不忘。是蓋能知其本者也。

